



# Wedau Mark

Wedau Mark



## **Wedau Mark**

### **The Gospel of Mark in the Wedau Language of Papua New Guinea**

Buk Mak long tokples Wedau long Niugini

Language: Wedau

Provided by: Wycliffe Bible Translators

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

### **Copyright and Permission to Copy**

Copyright © 2010 Wycliffe Bible Translators, Inc.

Copyright © 2010 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

8d4fba39-a427-53d6-872e-1750c02f7738

ISBN: 978-1-5313-0692-2

## Mark

*Riwana Aiaina, Mark i girugirumia*

### Pariverena

Wei bukana, lamna naona girumana Iesu ana nola ma ana viararamana riwana i girumi. Rava wei bukana i girumi, wavana eġa ita riweta. Wate numa-taparoro babadai wariāgai ivi araramana da Mark i girumi. Mark, tauna eġa Apasol, wate tauviararamana maġamaġau i notai da tauna, Peter maiteni au Rome i mae. Ma Peter, Iesu ana kua ma ana viararamana maġamaġai Mark i riwei. Anina ma Mark wei riwana i girumi da tauvitumaġana au Rome ita aramanei, Iesu aiwai i kauēi.

Riwa karena i girugirumia evivi eġeta da *wei lamna Iesu Keriso God Natuna Riwana Aiaina*. Au baina, wei au bukana ta inainai Iesu awarina rewapana da kua maġamaġau ita kauēi. Wei kauai tana inainai maranai: evivi araramana; ma arua-apoapoei evivi aġaġana-opune; ma rava doridoriai evivi lawani; ma ġoa-apoapoe e notanota-tawanei. Mark, Iesu ana nola ma ana kauai i girumi ma eġa ana viararamana ita giruma guratei. Mark ivi eġeta menanare Iesu au korosi i iraġe da rava anatapui itavi lawanai ma God menanare, Iesu iraġalei ivo vai-mairini.

### John Taubabataito Iesu ana aninae ivovo kaukauei

*(Mat 3:1-12; Luk 3:1-18; Jhn 1:19-28)*

**1** Wei lamna *Iesu Keriso* God natuna *Riwana Aiaina* karena.

<sup>2</sup> Me wariāġa *peroveta* Isaiah i girugirumia nanare:

*“Ona rau-taniġana! Au peroveta au naom ana paritawanei da am aninae inavo kaukauei.” (Mal 3:1)*

<sup>3</sup> *“Peroveta au mutulua evivi ġoreġore:*

*“Taumi Bada ana aninae ona vokaukauei, ana eta ona vovai-jjimani!” (Isa 40:3)*

<sup>4</sup> Anina ma taupariverena John i nei au mutulua da rava i bababataitoi ma God riwana i jimejime i pa, “Ami ġoa-apoapoe onavo terei ma *ona mae-taviremi* God awarina ma ami ġoa-apoapoe ina nota-tawanei ma ana babataitoimi.” <sup>5</sup> Ma rava anatapui *Judia* au paratana ma au *Jerusalem* i nae da John ita rau-taniġanei. Maranai ai apoapoe i rupeni, John, tau i babataitoi au waira *Jordan*.

<sup>6</sup> Ma John, *kamel* aparana metametanana i oteoteni ma ana tairoro ġamoġamo opina. Ana lam kapau ma manigewa. <sup>7</sup> Ma tauna, rava i ririwei i pa, “Rava au muriu e nenei i ġetelara, eġa me tau. Eġa tagotagogiu da ana ae-uma ġuravana ana rupeni.

<sup>8</sup> Tau wairei a babataitoimi, wate tauna, Arua Vivivireinei ina babataitoimi.”

### John Iesu i babataitoi

*(Mat 3:13-17; Luk 3:21-22)*

<sup>9</sup> Lamna maranaina Iesu, *Nasaret*, *Galili* i netawanei ma i nei mepa John i bababataito-lana. Ma John au waira *Jordan*, Iesu i babataitoi. <sup>10</sup> Ma maranai Iesu wairei i ġeġetai, i inana da mara i wana-tawanei<sup>a</sup> ma *Arua Vivivireina* me gabubu

<sup>a</sup>1:10 Isa 64:1

i ġairai ma orana ivi oai. <sup>11</sup> Ma God ponana marei i opu ma i riwa i pa, “Tam, tau natu au nuavaina ma uvi nuaiainiu.”

### Satan Iesu i raelari

(Mat 4:1-11; Luk 4:1-13)

<sup>12</sup> Ma lamna au murina God Aruana Vivivireina Iesu i paritawanana opunei au mutulua. <sup>13</sup> Ma au pom 40, Iesu au mutulua i mae. Ma **Satan**, tauna i raelari. Gamogamo ġaiġaiawai nai au dobuna i mamae ma God ana **anela** marei tauna i paini.

### Iesu lebalebaġai ruaġa ma ruaġa i rau-kwatuei

(Mat 4:12-22)

<sup>14</sup> Ma Wavalatona **Herod**, John i pani da panipani au numana i terei.<sup>b</sup> Ma muriai Iesu i nae au **Galili** da rava awarii God **Riwana Aiaina** i jimej. <sup>15</sup> Ma Iesu i ririwa i pa, “God ana mara vinevinena i ġetai. God ana vibadana vouna rava au bai, lamna i turiai. Ami ġoa-apoapoena **ona rupeni** ma **Riwana Aiaina** onavi tumaġanei!”

<sup>16</sup> Mara tagogi Iesu **Galili** topana au gera i bababara nae ma lebalebaġai ruaġa i inanai, Simon ma ana tevera Andrew au topa i rarau-agida. <sup>17</sup> Iesu i riwei i pa, “Ona nei ma onavo taġotaġoiu. Ma me marina iana o tutuarui; nanare anavi araramanami da rava ona tuarui da inavi tumaġaneu!”

<sup>18</sup> Ma maratogogi ai agida ivo terei ma Iesu ivo taġotaġoi. <sup>19</sup> Ma tauj au gera i verau-nae. Iesu, **Sebidi** natunatuna i inanai, James ma John ai au waga ai agida wanawana-rorona ivo kaukauei. <sup>20</sup> Ma maratogogi tauj i ġorei, “Taumi ona nei ma tau onavo taġotaġoiu!” Ma tauj amaj **Sebidi**\* ana taunola maiteni ivo terei ma Iesu ivo taġotaġoi.

### Iesu, arua-apoapoena rava awarina ivi aġaġana opunei

(Luk 4:31-37)

<sup>21</sup> Iesu, ana **Tauvotaġotaġo** maiteni i nae au **Kapenaum**†. Ma au **Sabate**, Iesu i rui **pari au numana** ma God Riwana Aiaina, viararamanana ivi karei. <sup>22</sup> Tauna ana rewapanana ivi araramana eġa me mai **Jew** ai **Tarawatu Babadai**‡ nanare. Ma tau-**rautaniġana** ana viararamana i baiei.

<sup>23</sup> Marana Iesu pari au numana ivivi araramana ma oroto **arua-apoapoena** orana i ruiruinia i garara <sup>24</sup> i pa, “Iesu **Nasaretei**, aiwai e ġoeġoei awariai. Tam weka u nei da mavi apoapoenai bo? Tau aramanej tam aiaj. Tam Vivivireim Godej!”

<sup>25</sup> Ma Iesu riwa bagibaginej i riwei i pa, “Ma genuana! Nai orotona ma oputawaneij!”

<sup>26</sup> Ma arua-apoapoena nai orotona ivi aikwajiej ma ponana i rata, i garara ma i oputawaneij. <sup>27</sup> Ma rava anatapui i bana kauej ma tauj avaj ivi tarapiri, “Wej aiwai? Wej viararamana vouna ma ana rewapanana maiteni! Wej ravana awarina rewapanana

\* **1:20** Eng. Zebedee.

† **1:21** Eng. Capernaum.

‡ **1:22** Wariġa, God ana **Tarawatu** Moses i verej mai Israel au bai.

<sup>b</sup> **1:14** Mrk 6:14-29

e mamae da arua-apoapoena i riwei ma tauna ivovo teletelei!”<sup>28</sup> Iesu nolana, maratagogi i tua *Galili* au anatapuna.

### Iesu rava maḡamaḡau i vi lawani

(Mat 8:14-17; Luk 4:38-41)

<sup>29</sup> Nai marana pari au numana i oputawanei ma ana tauvotaḡotaḡo maiteni i nae Simon ma Andrew ai au numa; James ma John maiteni i nae.<sup>30</sup> Simon poiiana wavinena ini ḡuḡurana ana au animatave i matamatave ma maranai Iesu i ḡeta ma numa ravai, tauna i parivere. <sup>31</sup> Tauna i nae wavine awarina, nimana ivo jijini ma ivo agui da ivo mairi. Lamna maranaina, ini ḡuḡurana ivo terei ma wavinena, tau i paini.

<sup>32</sup> Ma au bigai madeḡa i neulai au murina, rava, ai rava doridoriai ma tau i aiavo arua-apoapoei au orai maemae, i neiai Iesu awarina.<sup>†</sup> <sup>33</sup> Ma rava anatapui nai au melagaina ivi tagogiei numa au metaetana. <sup>34</sup> Ma Iesu, maḡamaḡau ai doria nununai ivi lawani ma arua-apoapoe maḡamaḡau rava awari ivi aḡaḡana opunei. Ma arua-apoapoena i aramanei da tauna anina God natuna ma lamna au baina tau i vi ḡaei da i genuana.<sup>§</sup>

### Iesu au *Galili* i rarau-gugula

(Luk 4:42-44)

<sup>35</sup> Ubaubanai boiboḡi, Iesu ivo mairi ma numa i oputawanei ma i nae gabu au genugenuanana. Ma kampa, God awarina i raupari. <sup>36</sup> Muriai, Simon varevareina maiteni i nae da i baiei. <sup>37</sup> Ma maranai Iesu i nelaḡai, ma i riwei i pa, “Rava anatapui e baibaieim.”

<sup>38</sup> Iesu i paribelei i pa, “Tana nae melagai ḡelau i ḡereḡere, ma kampa maiteni God *Riwana Aiaina* ana rau-gugulei. Tau wei lamna au baina a nei.” <sup>39</sup> Ma *Galili* au anatapuna i naeni ma pari au numai i rarau-gugula ma arua-apoapoei ivi opuni.

### Iesu oroto ivi lawani

(Mat 8:1-4; Luk 5:12-16)

<sup>40</sup> Anina ma oroto *lepeleperana*, Iesu awarina i nei ma au naona i peu ma i raudune ma agu ivi baḡei i pa, “Mepa da ma ḡoei, anina da mavi aiainiu.”<sup>\*\*</sup>

<sup>41</sup> Ma Iesu nuabola orana i oai ma urana ivi loloi da ivo dadani ma i riwa i pa, “Anina a ḡoeḡoei, ma ai!” <sup>42</sup> Ma maratogogi opi-doriana, oroto ivo terei ma tauna i ai me. <sup>43</sup> Anina ma Iesu i riwana guratei i pa, <sup>44</sup> “Tam ma nae! Aiwai i tuputupua awarim, eḡa rava mavi eḡei! Ma jijimanina ma nae *Pirisi* awarina mavi etataiana

<sup>†</sup>1:32 Madeḡa ina neulai au murina anona lauvitau ana mara damona. Mai Jew ai lauvitau ana mara au Friday madeḡa e neneulai au murina evivi karei da Saturday madeḡa e neneulai au murina e vorovorovei.

<sup>§</sup>1:34 Iesu i aramanei, mepa da ita kauei da arua-apoapoei ita riwa da tauna Keriso; lamna rava tauna ita egari da sorodia itavi badei, me tau i evivi nuanotenotei nanare. Jhn 6.15 ma inana.

<sup>\*\*</sup>1:40 Mai Jew ai *Tarawatue* ririwa da rava lepeleperai, tau i miramirai ma dobu ḡela ravai (eteni). Mai Jew amapo nai ravai eḡa inavo dadani. Rava miramirai eḡa maiteni inavi taparoro bo au melagai ina mae. Lamna au baina mepa da rava miramirana i lawana, tauna ina ai me, God tauna ina vai-melei ma rava maiteni ina mae ma ina taparoro.

melem mavi aiaina **pulona** Moses i ririweia ma kauai da inavi mataira tau awari! Piri ana vianina ina verei da tauna i lawana.”

<sup>45</sup>Wate orotona i nae ma aiwai awarina i tuputupua lamna melagai au anapuna i babani ana naiei. Ma lamna au baina Iesu melagai anapuni i vorei ma mepa ega rava ita mamaelana kampa i nae. Wate rava mepa maemaei i nei Iesu awarina.

### Iesu oroto gwaḡagwaḡana ivi lawani

(Mat 9:1-8; Luk 5:17-26)

**2** Iesu ana tauvotaḡotaḡo maiteni i wanavira melei au *Kapenaum*. Ma au pom ru-aḡa au murina, rava nolana i nonori da tauna au melagai i nememei. <sup>2</sup>Ma rava maḡamaḡaui ivi tagogiei i numa. Patara i rata guratana da numa i oai ma metaeta maiteni i mae potai. Iesu, God riwana i rarau-gugulei. <sup>3</sup>Nelara 4, oroto gwaḡagwaḡana rasirasiei i avarai da i nei Iesu awarina. <sup>4</sup>Rava i maḡa guratana ma ega tagotagogina da ita nei Iesu awarina, lamna au baina da tetelei i amḡaena da au poewa ma gavogavo i bauni ma kampa gwaḡagwaḡana ana rasirasina i tere-ḡairei Iesu au naona. <sup>5</sup>Ma Iesu, nai ravai i inanai da ai **vitumaḡana** i rata, lamna au baina gwaḡagwaḡana i riwei i pa, “Natu, am ḡoa-apoapoei, a nota-tawanei.”

<sup>6</sup>Anina mai *Jew* ai **Tarawatu Babadai** ḡelau kampa i kiakiala, au orai ivi nuanotanota i pa, <sup>7</sup>“God ainelana ḡoa-apoapoei e notanota-tawanei. Aiwai au baina wei ravana nanare e bababani? Tauna, God evivi jiboḡi ma e ririwa da tauna, God nanare.”

<sup>8</sup>Maratagogi, Iesu i aramanei da tau i orai nanare ivivi nuanotanota ma i riwei i pa, “Aiwai au baina wei kauai ovivi nuanotenotei? <sup>9</sup>Metauna i telatela: Gwaḡagwaḡana ata riwei, ‘Am ḡoa-apoapoe a nota-tawanei.’ Bo ata riwei, ‘Mavo mairi, am animatave ma vaia ma ma babara?’ <sup>10</sup>A ḡoei da taumi ona aramanei da **Rava Natuna**<sup>c</sup> au dobu ana rewapana e mamae da rava ai ḡoa-apoapoe ina nota-tawanei ma inavi lawani.” Ma gwaḡagwaḡana i riwei i pa, <sup>11</sup>“A riwem, mavo mairi, am animatave ma vaia ma ma nae au numa!”

<sup>12</sup>Orotona ivo mairi, ana animatave i vaia ma maratagogi i babara. Ma patara i rarausiga, i bana kauai ma God ivo epaepai ma i ririwa, “Tauai ega melanai kaua wenanare ata inanai!”

### Iesu, Levi i kwatuei

(Mat 9:9-13; Luk 5:27-32)

<sup>13</sup>Iesu, *Kapenaum* ivo terei ma **Galili** topana au gerana i bababara ana tauvotaḡotaḡo maiteni. Ma patara i nei awarina ma tauna God riwana viararamanana ivi karei. <sup>14</sup>Ma ivi raunae aburuna ma oroto tagogi i inanai wavana Levi, *Apius*<sup>††</sup> natuna. Ma tauna ana bagibagi au gabuna i kiakiala ma *tax* i tamitami Rome gabemanina au baina. Iesu i riwei i pa, “Mavo taḡotaḡoiu!” Levi ivo mairi ma ivo taḡotaḡoi.

<sup>††</sup>2:14 Eng. Alphaeus.

<sup>c</sup>2:10 Dan 7:13-15

<sup>15</sup> *Tax* tautami ma ḡoa-apoapoei ravai maḡamaḡau, Iesu ma ana tauvotaḡotaḡo ivo taḡotaḡoi. Ma anatapuī, Levi ana au numa i kiala gogona ma i amam.<sup>‡‡</sup> <sup>16</sup> *Jew* ai Tarawatu Babadai ḡelau, tauī maiteni Farisi, i inanai da Iesu *tax* tautami ma ḡoa-apoapoe ravai maiteni i amam. Anina ma tauī, Iesu ana tauvotaḡotaḡo i riwei i pa, “Aiwai au baina Iesu *tax* tautami ma ḡoa-apoapoei ravai maiteni e amam?”

<sup>17</sup> Ma maranai Iesu wei riwana i nononori ma tauī i riwei i pa, “Rava lawalawai, doketa eḡa ita ḡoeḡoei ma rava doridoriai, doketa e ḡoeḡoei. Tau a nei rava apoapoei au bai ma eḡa rava jijimani au bai.”

### Uji vitaraviravirana

(Mat 9:14-17; Luk 5:33-39)

<sup>18</sup> Mara tagogi, John Taubabataito ma *Farisi* ai tauvotaḡotaḡo i ujiuji. Ma rava ḡelau i nei Iesu awarina ma ivi taravirevirei, “Aiwai au baina John Taubabataito ma *Farisi* ai tauvotaḡotaḡo e ujiuji, wate tam am tauvotaḡotaḡo eḡa ita ujiuji?”

<sup>19</sup> Iesu i paribelei i pa, “Taumi o notanotai da tauī aiavoī i rau-kwatuei tavine ana au torela, ina mae lota bo? Eḡateni kua! Maranai tavitavine vou orotona, tauī maiteni e mamae, tauī eḡa ina uji. <sup>20</sup> Wate mara ina ḡeta maranai tavitavine vou orotona ina vai-tawanei ma lamna maranaina ana rava ina uji.”

<sup>21</sup> Ma riwa e mamae, “[*Tau kua vouna a nei ai eḡa me taumi ami kua wadubona nanare.*] Eḡa ai ai ravana, gara vouna, gara au wadubona ina popo-ratui da gavogavo inavo potai. Mepa da nanare lamna, amapo gara vouna, wadubona ina roroi ma gavogavo ina rata. <sup>22</sup> Ma nanare, eḡa ai ai *wine* vouna ina vaini da *wine* aniterenana wadubona ḡamoḡamo opinei au orana ina iwaḡi. Mepa da ina kauēi, lamna *wine* vouna ina dodo ma *wine* aniterenana wadubona inavi airoroi ma *wine* ma ana aniterenana ina apoapoe. Wate *wine* vouna, anina da *wine* aniterenana vouna ina iwaḡi.”

### Iesu ana riwa Sabate au baina

(Mat 12:1-8; Luk 6:1-5)

<sup>23</sup> Mara tagogi au *Sabate*, Iesu ana tauvotaḡotaḡo maiteni, *witi* wapuna au orana i nenaē. Ma ana tauvotaḡotaḡo *witi* i vaini ma i amam. <sup>24</sup> *Farisi* ḡelau i inanai wei kauana i kaukauēi ma tauī Iesu i riwei, “Ma inanai, ata *Tarawatu* e mamae da *Sabate*, lamna lauvitau ana mara. Aiwai au baina tauī evovo bagibagi?”

<sup>25</sup> Iesu i paribelei i pa, “Me *peroveta* i girugirimia nanare. *David* ana tauvotaḡotaḡo maiteni am-iraḡe ma aiwai i kauēi?<sup>d</sup> Taumi o iavi ma aiwai au baina anona, eḡa ota vinua-notenotei? <sup>26</sup> *Pirisi Ḡeḡetelarana Abiata* ana au mara, David, God ana au numa i rui ma palawa viviaiaina i vaia ma ḡelau ana tauvotaḡotaḡo maiteni i verei da i ani. Moses ana *Tarawatu* e mamae da *pirisi* ava palawana e aniani.”

<sup>27</sup> Ma Iesu ana riwa au damona i riwa i pa, “God, *Sabate* i kauēi da rava voaguna au baina ma eḡa rava ita kauēi *Sabate* voaguna au baina. <sup>28</sup> Onavi nua-notenotei, tau *Rava Natuna*, lamna au baina tau anina *Sabate* badana.”

---

<sup>‡‡</sup>2:15 Moses God ana Tarawatu i girumi ma mai Farisi wei Tarawatuna ivo taḡotaḡo kauēi. Ma tauī kua waduboi amamai ḡariei maiteni ivovo teletelei ma i riwa da aiavoī Tarawatu eḡa itavo teletelei lamna tauī rava apoapoei, ḡoa-apoapoe tau kauēi.

<sup>d</sup>2:25 1 Sa 21:1-6

### Iesu, Orotu urana irairāgena ivi lawani

(Mat 12:9-14; Luk 6:6-11)

**3** Mara ġelauna au *Sabate*, Iesu i nae me **pari au numana** ma oroto urana irairāgena i inanai kampa i kiakiala. <sup>2</sup>Ma **Farisi** ġelau i ġoei da aiwaiei Iesu itavi wavui. Lamna au baina i inana taġotaġoi da oroto itavi lawani bo eġa au *Sabate*. <sup>3</sup>Ma Iesu, orotona i riwei, “Ma nei, au naoi ma mairi!” <sup>4</sup>Ma Iesu, ravai ivi tar-avirevirei i pa, “*Sabate* au marana, metauna i ai: Aiaina tana kauiei bo apoapoena? Tanavi lawana bo tanavi raġena? **Tarawatu** aiwai i riwei?” Ma anatapui i genuana. <sup>5</sup>Iesu ana amloġaiġaina i inana viravira ma i inanai da tau i orai i bado ma nuanuana i bola-kauiei. Ma Iesu, orotona i riwei i pa, “Uram mavi loloi!” Ma ivi loloi ma i lawana. <sup>6</sup>Ma **Farisi** maratagogi i opu ma i nae **Herod** ana rava awarii<sup>¶</sup> ma ai oga i tarai da Iesu mena itavi raġenanei.

### Iesu, Patara awari i babani

<sup>7-8</sup>Iesu ana tauvotaġotaġo maiteni, tau i netawanei ma i nae au gera da itavi lauvitau ma mai *Galili* patara ġaegāena, tau i ivo taġotaġoi. Rava maġamaġau, Iesu aiwai i kaukaueia nolana i nonori ma mai *Judia, Jerusalem, Idumia*<sup>§§</sup> ma melagai ġelau waira *Jordan* au babagelauna, *Taia* ma *Sidon*,<sup>\*</sup> tau anatapui i nei Iesu awarina. <sup>9-10</sup>Iesu, rava maġamaġau ivi lawani. Ma lamna au baina doridoriai maġamaġau ivivi amdudu ma i ġoei da tauna itavo dadani. Lamna au baina ana tauvotaġotaġo i riwei da waga ivo kaukauei. <sup>11</sup>Maranai, arua-apoapoei rava au orai maemaei, Iesu i inanai ma au naona i peu ma i garara, “Tam God Natuna!”

<sup>12</sup>Wate Iesu tau i ivo ġaei da avena itavi eġa da tauna ai.

### Iesu ana Apasol 12 i vinei

(Mat 10:1-4; Luk 6:12-16)

<sup>13</sup>Anina ma Iesu i ġae au ola ma ana ġoana nanare, rava i kwatuei da awarina i ġei. <sup>14</sup>Tauna, nelara 12 i vinei da maiteni ita mae ma muriai ita paritawanei da ita rau-gugula. Ma tau i ġorei **Apasol**. <sup>15</sup>Ma ivo vai-virewapani da arua-apoapoei rava au orai inavi opuni.

<sup>16</sup>Tau i vinevinei 12 ai wava wenanare,

Simon i ġoreġoreia Peter<sup>†</sup>

<sup>17</sup>ma *Sebidi*<sup>‡</sup> natuna James ma ana tevera John i ġorei *Boanerges*, anona wai parara natunatuna,

<sup>18</sup>Andrew,

Philip,

---

<sup>¶</sup>**3:6** Herod ana rava anona lamna mai Jew ai boru, tau aiavoi Rome gabemanina ivovo agui. Tau ai bada wavalatona Herod Anti pas. Mai Jew maġamaġau ma mai Farisi maiteni, i notai da Herod ana rava tau i tauvibenabenam ai rava au oiena awarii.

<sup>§§</sup>**3:7-8** Eng. Idumea

<sup>\*</sup>**3:7-8** Eng. Tyre & Sidon. Rava eġa mai Jew live there.

<sup>†</sup>**3:16** Anona *Ġaima*.

<sup>‡</sup>**3:17** Eng. Zebedee



Batolomeu,<sup>¶</sup>  
 Matthew,  
 Thomas,  
 James, *Apius*<sup>§</sup> natuna,  
 Tadeus,<sup>\*\*</sup>  
 Simon, tauna Zealot,<sup>††</sup>

<sup>19</sup> ma Judas *Iskariotei* <sup>‡‡</sup>tauna Iesu tau-vibenabenameina.

### Rava i riwa da arua-apoapoei Iesu evivi badei.

(*Mat 12:22-32; Luk 11:14-23; 12:10*)

<sup>20</sup> Ma Iesu ana tauvotaḡotaḡo maiteni i rui au numa. Ma patara i rieiai da tau i eḡa tagotagogina da ita am. <sup>21</sup> Ma Iesu ana numa ravai nolana i nonori ma i riwa i pa, “Tauna i bua.” Lamna au baina i nei da ina taravaini.

<sup>22</sup> **Tarawatu Babadai** ḡelau *Jerusalemei* i nei ma i riwa i pa, “Arua-apoapoei, ai bada *Bielsibab*,<sup>¶¶</sup> Iesu au orana i rui. Ma lamnei arua-apoapoei evivi opuni.”

<sup>23</sup> Lamna au baina Iesu, Tarawatu Babadai i ḡorei ma awanainei i pa, “**Satan** amapo *Satan* eḡa inavi opuni. <sup>24</sup> Mepa da **dobu ravai** inavi ḡavia vivira, lamna dobuna ita mae ava. <sup>25</sup> Ma nanare dam inavi ḡavia vivira, nai damna ita mae ava. <sup>26</sup> Ma *Satan* itavo mairi ma itavi ḡavianana melei, amapo ita mae ava. <sup>27</sup> Taudanene amapo eḡa rava virewapanana ana au numa ina danene, eḡa da au naona ravana ḡuravei ina raḡini ma muriai ina danene. <sup>28</sup> Riwa kaua a ririwemi da God ami apoapoei ma ami vijiboḡa anapui ina nota-tawanei. <sup>29</sup> Wate aiai ravana **Arua Vivivireina** evivi jiboḡi God, nai ravana ana ḡoa-apoapoei eḡa melanai ina nota-tawanei ma ana ḡoa-apoapoei ina mae nonoa.” <sup>30</sup> Iesu wenanare i babani, anona rava ḡelau e ririwa, “Iesu au orana arua-apoapoei e mamae.”<sup>§§</sup>

### Iesu ana dam oina

(*Mat 12:46-50; Luk 8:19-21*)

<sup>31</sup> Iesu alona ma varevareina i nei ma au doa i maimairi ma riwa i paritawanei Iesu awarina da ita nei. <sup>32</sup> Ma patara, tauna i kiala kwaviviroi ma tau i Iesu i riwei i pa, “Alom ma novunovum ma varevareim au doa ma e ḡoeḡoem.”

<sup>33</sup> Iesu i paribelei i pa, “Aiai alou ma aiavoi varevareiu?” <sup>34</sup> Anina ma Iesu, tau i kiakiala i inanai ma i riwa i pa, “Ona inana wei tau i alou ma varevareiu! <sup>35</sup> Aiai God ana ḡoana e kaukauei, tauna alou ma novu ma vareiu.”

<sup>¶</sup>3:18 Eng. Bartholomew

<sup>§</sup>3:18 Eng. Alphaeus

<sup>\*\*</sup>3:18 Eng. Thaddaeus. Wavana ḡelauna Judas Luk 6:16

<sup>††</sup>3:18 Anona lamna tau i mai Jew ma tau i Romans evivi ḡaviei.

<sup>‡‡</sup>3:19 Rava notanotai da Iskariot, lamna Judas ana melagai.

<sup>¶¶</sup>3:22 Eng. Beelzebub. Anona lamna, *nabugara ai bada*.

<sup>§§</sup>3:30 Tarawatu tau girumi i parivai-jijigei au baina tau i e ririwa da Arua Vivivireina ana nola lamna baravu da parauma. God eḡa melanai ai ḡoa-apoapoei ina notatawanei.

## Doa tapuna ma tapuna ai awanaina

(Mat 13:1-9; Luk 8:4-8)

**4** Iesu, giu i rau-karena melei **Galili** topana au adana. Ma patara i riei da ita rau-taniġanei. Ma patara i rata, au baina tauna au waga i geru ma i kiala ma waga i dudui da ivi rau-opu au topei ma patara au gera i mae.

<sup>2</sup>Ma kaula maġamaġau awanaini i giu ma ivi araramana. <sup>3</sup>Tauna awanaini i babani ma i riwa i pa, “Ona rau-taniġana! Taupaewa, ana wapu ivo kaukauei ma pei i ravi awawari. <sup>4</sup>Pei ġelau i au eta i peu. Ma kiu i ġeta ma i ani. <sup>5</sup>Ma pei ġelau doa au ġaiġaimana i peu mepa doa au avavana. Ma lamna au baina maratagogi i gogo. <sup>6</sup>Wate maranai madeġa i rarani, maratagogi i poi, anona warami eġa ita ġaira guratana doa au orana. <sup>7</sup>Pei ġelau, ai donadonai au poui i peu. Ma ai donadonai i gogo ma pei i gogogo i lavani ma eġa ita ua. <sup>8</sup>Ma pei ġelau doa au aiaina i peu ma i gogo kaula ma i ua, ġelau 30, ġelau 60 ma ġelau 100.”

<sup>9</sup>Ma Iesu i riwa i pa, “Mepa da taniġami e mamae, riwa ona nonori!”

## Aiwai au baina Iesu awanaini i babani

(Mat 13:10-17; Luk 8:9-10)

<sup>10</sup>Maranai Iesu ainelana i mamae ma ana tauvotaġotaġo 12 ma tau-rautaniġana ġelau i ġeta ma Iesu ivi baġai da awanaina anona ita riwei.

<sup>11</sup>Ma Iesu i paribelei i pa, “**God ana vigulau** ana kaula mamae govaġana; taumi ivi eġemi ma rava au tano maemaie, tui aiwai anatapui awanaini e pari parivereie.

<sup>12</sup>Lamna ana kauie da wariaġa **peroveta** aiwai i girugirumia ina tupua:

*“Tui e inainana ma eġa ita inainana.*

*Tui e rarau-taniġana ma eġa ita araramanei;*

*ma lamna au baina tui eġa ita nenei God awarina*

*da ai ġoa-apoapoe ita nota-tawanei.” (Isa 6:9-10)*

## Doa tapuna ma tapuna anoi.

(Mat 13:18-23; Luk 8:11-15)

<sup>13</sup>Anina ma Iesu i riwei i pa, “Wei awanaini a babani ma anona eġa ota aramanei bo? Ma awanaina ġelau menanare ona aramananei? <sup>14</sup>Taupaewa, God riwana, rava anatapui e pari parivereie. <sup>15</sup>Rava ġelau orai i bagibagi me etanai. Riwa au tepana e raurauie, wate maratagogi **Satan** e nenei da riwa rava au orai e vaivai-tawanei. <sup>16</sup>Ma rava ġelau orai me doa viġaiġaimana. Tui, riwa i nonori ma maratagogi ana nuaiiai riwa e vaivaia. <sup>17</sup>Wate warami eġa da eġa ita mamae guratana. Ma maranai nuabola bo rau-iviapoapoe e nenei tui awari, au baina tui ai tumaġana God awarina e teretereie. Tui maratagogi e peupeu. <sup>18</sup>Rava ġelau orai me pei, ai donadonai au orai e gogogolana. Tui anina riwa e nononori. <sup>19</sup>Wate lawana ai nuabola ma mane ai nuavainana ma kaula ġelau ai au nuaiiai e ruirui ma God riwana e lavalavani da eġa ita uaua. <sup>20</sup>Ma ġelau, tui me pei doa au aiaina i peu. Tui, lamna anina riwa e nononori ma e vaivai-kauie ma e uaua: ġelau 30 ma ġelau 60 ma ġelau 100.”

<sup>21</sup>Iesu i riwei i pa, “Rava, eġa aniravilala ita neinei da iriga au gabaurina ita teretereie bo vatara au gabaurina ta pa? Aniravilala ana au anikiala e teretereie ta

pa? <sup>22</sup> Kaua mamae govaḡai, anapatupai avi eḡai ma kaua govagovaḡai nanarena anavi eḡai. <sup>23</sup> Mepa da taniḡami e mamae, riwa ona nonori!”

<sup>24</sup> Iesu i riwa i pa, “Aiwai o nononoria ona rau-taniḡanana kauēi, ruva o ruveruveia, God nanare awarimi ina ruvai ma ḡelauna ina tavipotoi. <sup>25</sup> Lamna au baina, mepa da riwau ona aramanei, tau ḡelauna ma ḡelauna ana veremi. Ma tau i eḡa ita aramanei, lamna aiwai aburuna i nononoria, lamna ina vineboai.”

### Pei gogogona ana awanaina.

<sup>26</sup> Iesu e ririwa i pa, “**God ana vigulau** me rava, *witi* peina au doa ita paepaewi. <sup>27</sup> Ma waguvara e matamatave ma maratom evovo mairi ma pei e gogogo ma e rarata. Wate aiwaiēi e gogogo, tauna evivi nuanainēi. <sup>28</sup> Doa ana nuaina, pei me *witi* evivi gogoi ma e uaua. Au naona e rarau-pairei ma muriai e roverove ma muriai anona e magumagura au tapina. <sup>29</sup> Maranai i magura, rava petona e rarau-karei. Tu aruta marana i ḡetai.”

### Pei aburuna ana awanaina

(*Mat 13:31-32, 34; Luk 13:18-19*)

<sup>30</sup> Iesu i riwa i pa, “**God ana vigulau** aiwai ana parivai-patepatei bo aiwai awanainēi ana pariveremi? <sup>31</sup> Wenanare, wei aina peina, lamna me gaga peina, pei aburuoina au dobu ma au doa i paewi. <sup>32</sup> Ma peina i gogo ma i rata da ai muomuoi i ḡetawane i ma raḡaraḡai ḡaeḡae i tere ma au ḡoui, kiu ai noḡi ita voai.”

<sup>33</sup> Ma Iesu, awanaina maḡamaḡau, rava au matai i rau-gugulei da tau i ai rau-taniḡana ana au ruva nanare. <sup>34</sup> Awanainēi, rava awari i giugiu, wate ana tauvotaḡo-taḡo, tau i ava awari kaua anapatui ivivi eḡai.

### Iesu, kojikojira i ravidaumorai

(*Mat 8:23-27; Luk 8:22-25*)

<sup>35</sup> Nai au bigaina Iesu, ana tauvotaḡotaḡo i riwei i pa, “Tana damana topa au baba ḡelauna.” <sup>36</sup> Anina ma **Tauvotaḡotaḡo**, patara ivo terei. Ma Iesu, metauna wagana au tepana i kiakiala. Kampa i geru ma anapatui i nae, waga ḡelau i maiteni. <sup>37-38</sup> Iesu, waga au murina unutana i terei ma i rau-nuavuru. Ma kojikojira ḡaeḡaena i tupua ma rabama, waga au tepana i rauraei ma waira, waga i oaoai. Ma ana tauvotaḡotaḡo, tauna i ravidagudagui ma i riwei i pa, “Taugiu, nuanuam e bolabolai bo eḡa da tana iraḡe?”

<sup>39</sup> Ma tauna ivo mairi ma ive ivi ḡaei ma i riwei i pa, “Ma genuana!” Ma rabama i riwei i pa, “Ma mae genuatau!” Ma ive i wana-tuini ma daumora ḡaeḡaena i matave.

<sup>40</sup> Iesu ana tauvotaḡotaḡo i riwei i pa, “Aiwai au baina o rovorovo? Taumi amapo da eḡa ota **vitumaḡana!**”

<sup>41</sup> Ma tau i rovo kaua ma i riwa vivira i pa, “Wei tauna aiai da ive ma rabama tauna evovo teletelei?”

### Iesu arua-apoapoena oroto awarina ivi aḡaḡana opunei.

(*Mat 8:28-34; Luk 8:26-39*)

**5** Iesu ana tauvotaḡotaḡo maiteni *Galili* topa au baba ḡelauna i ḡeta, mai *Gerasa* ai au dobu. <sup>2</sup> Wei au dobuna, **arua-apoapoena** oroto au orana maemaena. <sup>3-5</sup> Eḡa aiai tagotagogina da ita vovai-ubai. Mara maḡamaḡauna, aena ma urana seinei

i raġini. Wate maranaina sein i raġiraġinia, lamna sein ivi aituituini ma eġa tagot-agogina da seinei ita pani. Marai ma waguvarai i nene-labalababa ma i garagarara ma ġaimei tupuana i boribori melei ma au kokoaga ma au ola i rau-numa. <sup>6</sup> Maranai Iesu wagei i opuopu, arua-apoapoei orotona i ruiruinia, aueia Iesu i inanai ma kokoagei i ruba ma Iesu au naona i peu ma i raudune. <sup>7-8</sup> Iesu, ravana i riwei i pa, “Arua-apoapoea, wei orotona ma oputawaneii!” Ma orotona, ponana au aidamo ma i garara, “Iesu, God Aidamo Telerana Natuna! Aiwai awariu e ġoeġoei? God waneie avivi baġaim da eġa ma kovoġiu!” <sup>9</sup> Iesu, orotona ivi taravirevirei i pa, “Tam wavam aiai?”

I paribelei i pa, “Tauai a maġa, au baina tau wavau lamna **Ġavia Patarana**.”

<sup>10</sup> Ma orotona, Iesu ivi baġa guratei da avena arua-apoapoei nai au dobuna itavi opuna-tawaneii.

<sup>11</sup> Ma poro boruna ġaeġaena au ġereġere ola au adana i labalaba. <sup>12</sup> Ma arua-apoapoei, Iesu ivi baġai, “Ma paritawanelai poro au orai ana rui.” <sup>13</sup> Iesu ivi anina. Ma arua-apoapoei, orotona i oputawaneii ma poro au orai i rui. Poro boruna 2000 nanare olei i ruba ġaira da au topa i monu.

<sup>14</sup> Ma poro taupainii i ruba nae au melagai ma au wapu; ma riwa ivi babarai. Ma rava i nei da ita inanai aiwai i tupua. <sup>15</sup> Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma tau i rovo. <sup>16</sup> Ma aiwai i tupua orotona ma poro awari, taui inananaia, rava i riwana naiei.

<sup>17</sup> Ma dobuna ravai, Iesu ivi baġai da dobuna ita oputawaneii.

<sup>18</sup> Iesu au waga i gerugeru ma orotona, Iesu ivi baġai i pa, “Tau maiteni tana nae.”

<sup>19</sup> Iesu ivi ġaei ma i riwei i pa, “Ma nae me am au dam. Ma Bada kaua aiwai ġaeġaena i kaukaueia ma ana iviaiai tam awarim, taui ma pariverei.”

<sup>20</sup> Ma anina orotona, Iesu i netawaneii ma i nae au *Decapolis* (**melagai 10**) da Iesu aiwai awarina i kaukaueia, rava i riwana naiei. Ma taui anatapui i nononoria i baei.

### **Iesu, Jairus natuna wavinena ma wavine doridoriana ivi lawani.**

(*Mat 9:18-26; Luk 8:40-56*)

<sup>21</sup> Iesu wagei i damana me topa au baba-ġelauna. Maranai kampa i ġeta ma amapo topa au adana i mamae ma patara i rieiai. <sup>22</sup> Pari au numana badana tagogi, ana wava Jairus i nei Iesu awarina. Maranai tauna, Iesu i inanai, au aena i peu <sup>23</sup> ma ivi baġa guratei i pa, “Natu guguinina e irairaġe. Ma nei ma uram au inina ma terei ma ina lawana.”

<sup>24</sup> Anina ma Jairus, Iesu maiteni i nae ma patarana i mae gariguruvi ma ivo taġotaġoi.

<sup>25</sup> Wavine tagogi, tauna tara-doriana awarina i mae da madeġa 12 i kwa. <sup>26</sup> Ana mane anataputapuna, dokedoketa maġamaġaui awarii i tawaneii ma eġa tagotagogina itavi lawani ma amapo da ana doria i rarata. <sup>27-28</sup> Tauna, Iesu nolana ma ana babani i nonori ma au orana ivi nuanotanota i pa, “Mepa da ana gara ava anavo dadani ma ana lawana.” Ma tauna, Iesu murinei i nei ma ana gara ivo dadani. <sup>29</sup> Maratagogi, tara-doriana i wana-tuini ma malana i vaia da i lawana. <sup>30</sup> Nai maranaina, Iesu malana i vaia da ana rewapana i oputawaneii ma i mae tavirei patara au poui ma i riwa i pa, “Aiai au gara ivo dadani?”

<sup>31</sup> Ana tauvotaḡotaḡo, tauna i riwei, “Ma inanai, patara i mae gariḡuruvim! Ma menanare da u riwa ‘Aiai ivo dadaniu?’”

<sup>32</sup> Wate Iesu i inana viravira da ita inanai aiai ivo dadani. <sup>33</sup> Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui ivi eḡei. <sup>34</sup> Anina ma Iesu, wavine i riwei i pa, “Natu, am tumaḡana ivi lawanim. Am doria i kwa, ana nuubam ma nae!”

<sup>35</sup> Maranai i bababani ma rava ḡelauī Jairus ana numei i nei ma i riwei i pa, “Natum ana mara i kwa. Eḡa Taugiu ma visina-viravirai.”

<sup>36</sup> Iesu ai babani i nonora-tawanei ma Jairus i riwei i pa, “Eḡa ma rovo, *mavi tumaḡana!*” <sup>37</sup> Iesu, rava ḡelauī ivi ḡaei ma Peter ma James ma ana tevera John maiteni i nae. <sup>38</sup> Ma Jairus ana au numa i ḡeta ma Iesu, patara i inanai; i toutou ma i taratarakwatu <sup>39</sup> ma i rui ma tauī i riwei i pa, “Aiwai au baina o taratarakwatu ma o toutou? Tevera eḡa ita iraḡe, tauna e matamatave ota.”

<sup>40</sup> Ma tauī, Iesu i kakei, ma lamna au baina rava ivi opuni au doa ma tevera alona ma amana ma tauna ana tauvotaḡotaḡo tonuḡa maiteni i rui mepa tevera i matamatave-lana. <sup>41</sup> Iesu, tevera nimana i vaia ma i riwei i pa, “*Talitha koum!*” wei anona, “Kukuma, mavo mairi!”

<sup>42</sup> Maratagogi ivo mairi ma babara ivi karei (Tauna ana madeḡa 12). Ma tauī i ba kaua. <sup>43</sup> Iesu, tauī i riwana guratei da eḡa aiai itavi eḡei ma i riwa i pa, “Ona viambagibagi.”

### Mai Nasaret, Iesu i parivireirei

**6** Iesu ana tauvotaḡotaḡo maiteni nai dobuna i netawanei ma i nae me ana au melagai. <sup>2</sup> Ma *Sabate* marana i ḡeta ma tauna giu ivi karei *pari au numana*. Ma rava maḡamaḡauī i riei da i rau-taniḡanei. Tauī anatapui i baei ma ivi taraviravira vivira i pa, “Wei tauna nuaulaula ma aramanana mepa i vaia?” Ma, “Kaua aiwaiei e kaukauei?” <sup>3</sup> Anina ma tauī ava i babani vivira i pa, “Tauna tauvoa. Mary ana natuevou ma varevarena James, Joseph, Judas ma Simon ma novunovui weka e mamae tauna bo?” Ma lamna au baina mai *Nasaret*, Iesu i parivireirei.

<sup>4</sup> Iesu, tauī i riwei i pa, “*Peroveta* dobu au ḡelauī evivi virei, wate ana au melagai, ana rava ma ana dam oina, tauna eḡa ita vivivirei.”

<sup>5-6</sup> Tauna i baei da rava eḡa tauna itavi tumaḡanei. Tauna eḡa tagotagogina da *kaua vivirewapanai* kampa ita kauei. Tauna urana, rava ruaḡa ota doridoriai au tepai i terei ma ivi lawani. Ma muriai, melagai nununai au ḡereḡerei ivi araramana nae.

### Iesu ana Apasol i paritawanei da itavi araramana

<sup>7</sup> Ma Iesu, tauī 12 i ḡoreiai ma ruaruāḡei ava i paritawanana opunei melagai au nununai. Ma rewapana i verei da arua-apoapoei inavi aḡaḡana opunei. <sup>8</sup> Ma riwa bagibaginei i riwei i pa, “Ami au vaḡai, eḡa aiwai ona vaia anina jiḡona ava; eḡa lam, eḡa autu bo mane au urami. <sup>9</sup> Ae-uma ona oteni ma eḡa kwama ḡelauna ona vaia.” <sup>10</sup> Ma i riwei i pa, “Metauna melagaina o ruirui ma ivi aninemi. Numa tagonina au orana ona mae da melagaina ona oputawaneii. <sup>11</sup> Mepa da au melagai o ḡeta ma

rava eġa itavi aninemi bo eġa ita rau-taniġanemi. Nai melagaina ona oputawaneii ma aemi pokauna ona rau-abuabui da tau i ina aramanei da tau i ai wavu!”\* e

<sup>12</sup>Ma tau i opu ma rava awari i rau-gugula ma i riwei i pa, “Taumi ami ġoa-apoapoei onavo terei ma **ona mae-taviremi** God awarina!” <sup>13</sup>Tau i, arua-apoapoei ivi aġaġana opunei. Ma rava doridoriai maġamaġau, monamona au kolai i waġi ma ivi lawani.<sup>f</sup>

### Wawalatona Herod i notai da Iesu, lamna John Taubabataito

<sup>14-16</sup>Iesu nolana i nae da rava anataputapui i aramanei ma tauna i babaniei. Ma rava ġelau i ririwa i pa, “Tauna, **kaua vivirewapanai** e kaukauei, au baina tauna John Taubabataito iraġelei ivo mairi me.” Ġelau i ririwa i pa, “Tauna Elijah<sup>g</sup> i nememei,” ma ġelau i ririwa i pa, “Tauna **peroveta** wariġai nanare.” Ma Wawalatona **Herod**,<sup>†</sup> nolana i nonori ma i riwa i pa, “Tau, John Taubabataito uana a borituini; marina ivo mairi me.” <sup>17-20</sup>John ana virarautua, lamna wenanare. Muriai da Iesu ana viararamana nolana itavi karei. Herod, tuana Philip awana i kwalei ma i ravaġi. Wavinena wavana Herodias. Au murina John, Herod i riwana ġiriġiriei i pa, “**Tarawatu** e mamae da eġa vareim awana ma kwalei.” Ma Herod, riwa i paritawaneii da John i pani da panipani au numana i terei.<sup>h</sup> Herod ana nuaiaina, John i rarau-taniġaneii. Wate nuanuana i raġaraġa.

Ma Herodias, John awarina amlona i ġaiġai ma virāġenana i ġoei. Herod i aramanei da John, tauna rava jijimanina ma rava vivivireina ma i gagaloei. Herod, John i rovoei ma lamna au baina wavinena eġa tagotagogina da aiwai ita kauei.

<sup>21</sup>Ma wavine, gavogavo i inanai, maranai Herod ana tupua marana i ġeta ma torela ivo kaukauei. Ma gabemani babadai ġaeġaei ma ġavia ravai ai babada ġaeġaei ma **Galili** babadai i rau-kwatuei. <sup>22</sup>Ma Herodias natuna wavinena i nei ma i ara. Herod ma tau i maiteni i amam ivi nuaiaini. Ma wawalatona, guguini i riwei i pa, “Aiwai u ġoeġoeia mavi baġaiu ma ana verem!” <sup>23</sup>Ma i parivai-nuaġani i pa, “God au matana a ririwem da aiwai uvivi baġeiu ana verem da au vigulau navanavana au paratana.”

<sup>24</sup>Ma tevera wavinena i opu ma alona i paridadaneii i pa, “Aiwai anavi baġei?”

Ma i paribelei i pa, “John Taubabataito kolana.”

<sup>25</sup>Ma maratagogi ivi paparana ma wawalatona awarina i rui ma ivi baġai i pa, “A ġoeġoei da marina John Taubabataito kolana ma veru au aboma!” <sup>26</sup>Ma Wawalatona nuanuana i apoapoe kaua. Wate parivai-nuaġana boiboġi i kauei tau i amam au matai. Ma lamna au baina guguini, aiwai ivivi baġei anina ivi aninei. <sup>27</sup>Ma tauvirāġena i paritawaneii ma i riwei da John kolana ita neiai. Ma i nae panipani au numana ma John uana i borituini. <sup>28</sup>Ma kolana au aboma i terei ma guguini

---

\* **6:11** Wariġa mai Jew tauvaġai e nenememei au Israel, tau i au aei pokau e rarau-abuabui maranai Israel ana au parata e ġeġeta, lamna tau i orai evi aiaini. Ma Iesu ana tauvotaġotago wei i kauei da melagai ravai ina notai, “Tauvotaġotago e ririwa da tauta orata apoapoen me tauta eġa mai Jew.”

<sup>†</sup>**6:14-16** Herod Anti pas, Galili ana Wawalatona.

<sup>e</sup>**6:11** Act 13:50-51    <sup>f</sup>**6:13** Jam 5:14    <sup>g</sup>**6:14-16** 2 Kgs 2:1-15; Mal 4:5-6

<sup>h</sup>**6:17-20** Mrk 1:14

i verei ma guguini, alona i verei. <sup>29</sup> Ma John ana tauvotaḡotaḡo, nolana i nonori ma i nei ma taubeuna i vaia ma au kokoaga ivi mataveni.

### Iesu nelara 5000 i viam-bagibagi

(Mat 14:13-21; Luk 9:10-17; Jhn 6:1-14)

<sup>30</sup> *Asapol* i ḡeta memei ma aiwai anapatupuna i kaukauei ma i rarau-gugulei rava awari, Iesu ivi eḡei. <sup>31</sup> Lamna maranai, rava maḡamaḡau i nenei ma i nenaē da Iesu ana tauvotaḡotaḡo maiteni eḡa gavogavo mepa ita maemaē da ita am. Lamna au baina Iesu, tau i riwei i pa, “Taumi ava ona nei ma tana nae au mutulua da laumi ina tau mara aburuna.” <sup>32</sup> Ma anatapui wagei i nae au mutulua.

<sup>33</sup> Wate rava maḡamaḡau i inanai i nenaē ma i aramanei tau aiavo i ava. Ma melagai nununai anatapui geraei i ruba gogona da tau i au dobuna i aiḡeta. <sup>34</sup> Maranai Iesu wagei i tuopu au gera ma patara ḡaeḡaena i inanai ma nuanuana i bola-kauei tau i au baii. Tau me *sipu* ma eḡa ai tauvi pai pai. Ma *Riwana Aiaina* viararamanai i rau-karei.<sup>i</sup> <sup>35</sup> Ma au biga e tuturiai ma ana tauvotaḡotaḡo i nei awarina ma i riwei i pa, “Wei mutulua ma madeḡa e arearere. <sup>36</sup> Rava ma paritawanei da ina nae au melagai ma au wapu au ḡereḡere da ai lam ina gimarai.”

<sup>37</sup> Wate Iesu i paribelei i pa, “Taumi ona viam-bagibagi!” Ma tau i paribelei i pa, “Mepa 200 *denarii*<sup>‡</sup> tana vaia da wei patarana tana viam-bagibagi?” <sup>38</sup> Ma Iesu i paridadanei i pa, “Palawa biaḡa awarimi? Ona nae ma ona baiē!”

Maranai i nelaḡai ma i riwa i pa, “Awariai, palawa five ma iana ruaḡa.”

<sup>39</sup> Anina ma Iesu, patara i riwei i pa, “Boru nununai, gidagida au majimajiḡai ona kiala nae.” <sup>40</sup> Ma tau i ai au boru ome 50 da 100<sup>j</sup> nanare i kiala nae. <sup>41</sup> Ma Iesu, palawa five ma iana ruaḡa i vaia ma i ḡoutata au mara ma God ivi egualauei. Ma palawa ivo gimagimai ma iana i ḡutai da ana tauvotaḡotaḡo i verei ma tau i, rava i verei. <sup>42</sup> Ma patara i am ma i am iaua. <sup>43</sup> Ma ana tauvotaḡotaḡo, lam am tereterenai i tuarui da poa muomuoi 12 ivi oai. <sup>44</sup> Nelara 5000 i viam-bagibagi.

### Iesu, waira au tepana i babara

(Mat 14:22-33; Jhn 6:15-21)

<sup>45</sup> Anina ma Iesu, ana tauvotaḡotaḡo i egari da ita aidamana au *Bet-Saida*.<sup>¶</sup> Tau i waga i geru da i nenaē. Ma tauna, patara i paritawanei. <sup>46</sup> Patara i paritawanei ma tauna ava i ḡae au ola da ita raupari. <sup>47</sup> Ma waguvara ana tauvotaḡotaḡo au waga au topa ma Iesu au alala. <sup>48</sup> Ma ana tauvotaḡotaḡo, lare ivovo guratei da ita ḡota. Wate ive ivi rau-matamatani. Ma maratomtomo nanare, Iesu i nae awari. Tauna waira au tepana i bababara ma i ḡoei da tau i ita tutelarei.<sup>k</sup> <sup>49-50</sup> Ma maranai tau i, Iesu i inanai topa au tepana i bababara ma i notai da tauna konaḡa ma i rovo kaukauei ma ivi garagararei. Ma maratagogi Iesu i riwa i pa, “Tepami ina tora! Tau, eḡa ona rovo!”

<sup>‡</sup>6:37 200 denarii. Denarius tagogi lamna taubagibagi ai maia au pom tagogo nolana au baina.

<sup>¶</sup>6:45 Eng. Bethsaida

<sup>i</sup>6:34 Ezk 34:11-15; Jer 23:5-6; Num 27:17      <sup>j</sup>6:40 Exo 18:21

<sup>k</sup>6:48 Exo 33:19; Job 9:11

<sup>51-52</sup> Ma au waga i geru ma ive i wana-tuini. Tau i orai i bado ma ivi nuanaina, au baina eġa ita aramanei ana rewapana, kua palawa awarina i kauei. Ma lamna au baina tau i bana kauei.

### Iesu, rava doridoriai maġamaġau i Genesaret ivi lawani

(Mat 14:34-36)

<sup>53</sup> Tau i, topa i damani ma au *Genesaret* i ġeta ma ai waga i raġini. <sup>54</sup> Tau i, waga i netawanei ma rava, Iesu i inanai ma maratagoga i aramanei tauna ai. <sup>55</sup> Iesu nolana, *Galili* dobuna anapui i naeni ma i nonori da tauna mepa i mamae. Ma kampa, doridoriai rasirasiei ivi vaneiai. <sup>56</sup> Iesu mepa i nenelana, melagai ġaeġaei ma muomuoi ma wapu mepa rava e mamae-lana. Ma rava, ai rava doridoriai nai au melagaina i neiai au deba. Ma ivi baġa da doridoriai, Iesu ana gara adana ava itavo dadani. Ma aiavoi ava, Iesu ana gara ivo dadani i lawana.

### God ana Tarawatu mai Jew ai magumagura ai giu i ġetawanei

(Mat 15:1-9)

**7** <sup>1-4</sup> *Farisi* ma *Jew* anapui, magumagura ai giu maġamaġau e notanota jijini. Tau i, ai aniuma ma ai aniam anapui e oġaoġai da tau i itavi aiaina melei God au matana. Ma maranai au gimara da e nenei, urai ina oġa ma ina am. Tau i eġa ina am da au naona urai ina oġa kauei me ai magumagura ai giu nanare.

Maratagoga *Farisi* ġelau ma *Tarawatu Babadai*, Jerusalemei i nei Iesu awarina da ita rau-taniġane. Ma tau i inanai da Iesu ana tauvotaġotaġo ġelau, urai eġa ita oġai ma i amam.

<sup>5</sup> Ma tau i, Iesu ivi taravirevirei i pa, “Aiwai au baina am *Tauvotaġotaġo* magumagura ai giu, eġa itavo taġotaġoi ma ana ura miramirai e amam?”

<sup>6</sup> Ma Iesu i paribelei i pa, “Taumi morumorumi ma ovi kua aiaina mele. God ana *peroveta* Isaiah i riwa kua maranai i riwa, i pa:

*‘Wei ravai ipiriei evovo epaepaiu,  
wate nuauai aueia.*

<sup>7</sup> *Tau i rava ai giu evivi araramani.*

*Lamna au baina ai voepaepa anona eġa.’ (Isa 29:13)*

<sup>8</sup> Taumi, God ana *Tarawatu* o teretere tawanei ma ami giu ovo taġotaġoi.”

<sup>9</sup> Ma i riwana melei i pa, “Taumi o aramana kua da God ana *Tarawatu* o geduged-uaiei ma taumi amamami ai giu ovo taġotaġoi. <sup>10</sup> God ana *Tarawatu*, Moses i girugirumia nanare: ‘Amam ma alom ma vivirei’<sup>1</sup> ma ‘Aiai amana ma alona e enaena boai, tauna onavi raġeni.’<sup>m</sup> <sup>11</sup> Wate taumi ovi araramana da ai ai awarina mane bo purapura, amana bo alona itavo agui ma ita riwei, ‘Awariu purapura a ġoei da ata verem da atavo agui; wate a tereriei pulo, God au baina.’ <sup>12</sup> Wei viararamana, tau i evivi ġaei da amana ma alona eġa inavo agui. <sup>13</sup> Ma wei taunei viararamana, rava awari ovi damani; ma God riwana ovi kwakwavi. Ma kua maġamaġau ġelau maiteni o kaukauei.”



### Metauna kauai rava orai evivi mirai.

(Mat 15:10-20)

<sup>14</sup> Iesu, patara i kwatuana melei ma i riwei i pa, “Anatapumi ona rau-taniġaneu ma aiwai a ririwemi ona aramanei. <sup>15-16</sup> Aiwai au tanoei au orami e ruirui, lamna eġa ita vivi miraimi ma aiwai da oramiei e opuopu, lamna evivi miraimi God au matana.”<sup>§</sup>

<sup>17</sup> Anina Iesu, patara ivo terei ma i nae me au numa. Ma ana tauvotaġotaġo, tauna ivi tara-virevirei da wei awanaina anona aiwai. <sup>18-19</sup> Iesu i paribelei i pa, “Taumi maiteni eġa ota aramanei bo? Kaua aiwai au tano, rava au orai e ruirui amapo eġa inavi mirai. Anona lamna wei kauai, eġa ita ruirui rava au nuapouna, wate au manawana da e opuopu.” (Wei riwanei Iesu, lam anatapui ivi aiaini).

<sup>20</sup> Anina ma i riwa i pa, “Aiwai, rava oranei e opuopu; lamna, rava evivi mirai God au matana. <sup>21</sup> Anina rava nuanuanei vinuanotanota apoapoei e opuopu me: viawawana labalababa, danene, viraġena, awadanene, <sup>22</sup> ambo, rau-iviapoapoe, moru, erawa, unura, tere-vaideġa, maegāeġae ma opa. <sup>23</sup> Wei kauai apoapoei anatapui oranei e opuopu ma rava evivi mirai.”

### Dobu ġelauna wavinena Iesu ivi tumaġanei

(Mat 15:21-28)

<sup>24</sup> Ma nai melagaina ivo terei ma i nae *Taia* ana au parata. Ma i rui govaġa au numa ma eġa ita ġoei da rava ita aramanei da tauna kampa, wate eġa tagotagogina da ita rau-govaġa. <sup>25-26</sup> Wavine tagogi, Iesu nolana i nonori ma i nei awarina. Tauna eġa *Jew* ma dobu ġela ravana au *Fonisia* i tupua, Syria ana au parata. Arua-apoapoena, tauna natuna wavinena aburuna i ruini. Ma alona i nae Iesu au naona i raudune ma ivi baġai da *arua-apoapoena* natuna awarina itavi opuni. <sup>27</sup> Iesu i aramanei da tauna eġa *Jew*; lamna au baina i riwei i pa, “Eġa ita ai da roaroa ai lam ata vaia da auou ata verei da au naona roaroa ina am iaua.”<sup>\*\*</sup>

<sup>28</sup> Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoġina, kepakepa au gabaurina e rauraua e aniani.”

<sup>29</sup> Ma Iesu wei i riwei i pa, “Tam u paribelana kaua, au baina arua-apoapoena natum au orana avi opuna-tawanei. Ma nae me am au numa.”

<sup>30</sup> Ma wavine i nae me au numa. Natuna wavinena i inanai i matamatave, arua-apoapoena boiboġi tevera i oputawaneii.

### Iesu oroto taniġa-potapotana ma mena birebirena ivi lawani

<sup>31</sup> Iesu *Taia* ana parata i netawanei ma *Sidon* ma Decapolis i verautuini ma i nae au *Galili* topana. <sup>32</sup> Orotu taniġana potapotana ma menana birebirena i neiai Iesu awarina ma ivi baġai da urana au inina ita terei da itavi lawani. <sup>33</sup> Iesu, oroto i taravaina opunei da tau i ava ma ura-gigina, oroto au taniġana i terei ma ura-gigina ġelauna i ovai ma menana ivo dadani. <sup>34</sup> Nuanuana i bolai ma i ġoutata au mara; i lavutu

---

§7:15-16 Giruma ġelau Mark uranei i girugirumia wei riwai wenanare e mamae, “Mepa da taniġami e mamae, ona rau-taniġana.”

\*\*7:27 Riwa roaroa wei au awanaina lamna mai Jew. Tau i notanotai da tau i ai guratana eġa me rava ġelau. Lamna au baina tau dobu ġelau ravai e ġoreġorei auou.

tawanana ma oroto i riwei i pa: “*Efatha!*” Wei anona, “Ma wana-tawanei!”<sup>35</sup> Maratagogi taniġana i wana-tawanei ma menana ivi dagudagu ma i babani kaua.<sup>36</sup> Ma Iesu, tau i vii ġaei da aiwai i tuputupua, avena rava itavi eġei. Iesu, rava ivi ġaei; wate tau i eġa ita rau-taniġana ma riwa ivi tuai.<sup>37</sup> Ma maranai ravai wei i nonori, tau i bana kaui ma i riwa i pa, “Aiwai anatahui i kauana kaui. Tauna, rava taniġa potapotai evivi lawani da e rarau-taniġana ma menabirebirei e bababani.”

### Iesu rava 4000 i viam-bagibagi

(Mat 15:32-39)

**8** Nai maranai, patara ġaeġaena i riana melei. Patara eġa ai lam. Ma Iesu, ana tauvotaġotaġo i kwatuei da i nei ma i riwei i pa,<sup>2</sup> “Au pom tonuġa patara maiteni a mae ma ai lam eġa ma a rau-nuapoapoelei.<sup>3</sup> Tau i ġelau, uamei i nei. Mepa da ana am-iraeġi ana paritawanei ai au numa, tau i etanai ina rau-molaġau.”

<sup>4</sup> Ma ana tauvotaġotaġo i paribelei i pa, “Wei mutulua ma mepa lam tana vaia da wei patarana tana viam-bagibagi?”

<sup>5</sup> Ma Iesu, tau i paridadanei i pa, “Awarimi palawa biaġa?”

Tau i riwa i pa, “seven”

<sup>6</sup> Ma Iesu, patara i riwei da au doa i kiala. Ma palawa seven i vaia ma God ivi egualauei ma ivo gimagimai ma ana tauvotaġotaġo i verei da patara i verei.

<sup>7</sup> Ma tau i awari, iana muomuoi ruaġa ota. Iesu i vaia; God ivi egualauei ma ana tauvotaġotaġo i verei da patara i verei.<sup>8</sup> Tau i anatahui i am da i am iaua. Ma lam am tereterenai i tuarui da poa ġaeġaei seven ivi oai.<sup>9</sup> Rava 4000 i viam-bagibagi. Ma muriai i paritawanei ai au numa.

### Farisi God ana mataira ivi baġei

(Mat 15:39–16:4)

<sup>10</sup> Maratagogi, Iesu ana tauvotaġotaġo maiteni au waga i geru ma i nae *Dalmanuta* ana au parata.<sup>11</sup> **Farisi** ġelau i nei ma vi pari pariġai ivi karei Iesu maiteni. Tau i ġoei da Iesu ita rau-dadani da mataira Godei itavi atataiei.<sup>n</sup><sup>12</sup> Iesu, aruanei i lavutu tawanana ma i riwa i pa, “Wei kimta voui, aiwai au baina mataira e ġoeġoei? A ririwana kauemi, amapo mataira eġa ona inana.<sup>o</sup>”

### Iesu ana tauvotaġotaġo i parivai-notai

<sup>13</sup> Anina ma Iesu, patara i netawanei ma ana tauvotaġotaġo maiteni au waga i geru me ma i damana Topa **Galili** au baba ġelauna.<sup>14</sup> Ma ana tauvotaġotaġo, nu-anuai i vuru da ai palawa ita vaia ma palawa tagogi ava au waga i mamae.<sup>15</sup> Iesu, tau i parivai-notai i pa, “Farisi ma Herod ai ġiu<sup>††</sup> ma ai viararamana morumoruna ona inana kaui! Lamna me *ist*.”

<sup>16</sup> Ma tau i babani vivira i pa, “Tauta eġa ata palawa au baina da e ririweta.”

---

<sup>††</sup>**8:15** In the Jews' thinking, ‘yeast’ is picture talk for something that spreads rottenness/badness among people, like yeast spreads through flour. When Jesus says ‘yeast’ here, he is talking about the bad teaching and example/way-of-living of the Pharisees and Herod.

<sup>n</sup>**8:11** Deu 13:1-5; 18:18-22; Jdg 6:17-22; 1 Sa 2:34; 2 Kgs 20:8-11

<sup>o</sup>**8:12** Mat 12:39; Luk 11:29

<sup>17</sup> Ma Iesu i aramanei ma tau i riwei, “Aiwai au baina o bababani da taumi awarimi eġa palawa? Taumi amapo da eġa ota aramana ma ovivi nuanaina? Orami i bado bo? <sup>18</sup> Matami e mamae ma eġa ota inainana. Ma taniġami e mamae ma eġa ota nonora. Ma o notanotai bo eġa? <sup>19</sup> Maranai palawa five avo gimagimai rava 5000 au baii, lam am teretere nai o tami da poa biaġa ovi oai?”

Tau i paribelei, “Twelve.”

<sup>20</sup> “Ma maranai palawa seven avo gimagimai rava 4000 au baii, lam am teretere nai o tami da poa ġaeġaei biaġa ovi oai?”

Tau i paribelei, “Seven.” <sup>21</sup> Ma tau i riwei i pa, “Ma amapo da ovivi nuanaina!”

### Iesu, oroto matapotapotana ivi lawani au Bet-Saida

<sup>22</sup> Tau i nei au *Bet-Saida* ma rava ġelau, oroto matapotapotana i neiai Iesu awarina ma ivi baġai da inina itavo dadani. <sup>23</sup> Ma Iesu, oroto matapotapotana i raunimavoai ma melagaiei i taravaina opunei. Ma kampa matana i ovai ma urana au matana i terei ma i paridadanei, “Aiwai e inainanai bo eġa?”

<sup>24</sup> Ma i taepai ma i riwa, “Rava a inainanai ma tau me ai ita bababara.”

<sup>25</sup> Iesu, urana i tere-melei oroto au matana. Ma matana i wana-tawanei da aiwai anatapuna i inana kauai. <sup>26</sup> Iesu, tauna i paritawanei ana au numa ma i riwei, “Eġa ma nae au melagai!”

### Peter i riwa da Iesu, tauna Keriso

(*Mat 16:13-16; Luk 9:18-20*)

<sup>27</sup> Iesu, ana tauvotaġotaġo maiteni i nae melagaii *Sisaria-Fili pai* au ġereġerei. Maranai i nena ma Iesu, tau i paridadanei, “Rava e ririwa; tau aiai?”

<sup>28</sup> Ma tau i paribelei, “Ġelau e ririwa da tam, John Taubabataito. Ma ġelau e ririwa Elijah. Ma ġelau e ririwa da *peroveta* wariaġana tagogi.”

<sup>29</sup> Ma Iesu, tau i paridadanei, “Wate taumi, mena o notanotanei? O ririwa da tau aiai?”

Peter i paribelei, “Tam *Keriso*.” [Tauvilawana Godei]

<sup>30</sup> Iesu, tau i vi ġaei da eġa aiai ina riwei da tauna aiai.

### Iesu ana irāġe ma ana vomairi me i babaniei

(*Mat 16:21-23; Luk 9:21*)

<sup>31</sup> Ma Iesu i rau-karei da ana tauvotaġotaġo i giuni i pa, “*Rava Natuna* ina vinuapoapoe kaua. Ma dogadogara, *Pirisi Babadai* ma *Tarawatu Babadai*, tauna ina parigeduaiei ma tauna ina irāġe. Ma au pom tonuġa au murina inavo mairi me.”

<sup>32</sup> Iesu jijimaninei wei kauai i bababaniei ma lamna au baina Peter, tauna i taravaini au ririva ma enana ivi karei. <sup>33</sup> Wate Iesu i mae tavirei ma ana tauvotaġotaġo i inanai. Ma Peter i eni, i pa, “*Satan* ma nae au muriu! Tam am nota eġa Godei ita nenei, eġa da ravei.”

### Iesu votaġotaġona anona

(*Mat 16:24-28; Luk 9:23-27*)

<sup>34</sup> Ma Iesu, patara ma ana tauvotaġotaġo i rau-kwatuei ma i riwei, “Mepa da aiai itavo taġotaġoiu. Tauna ina boviaana melei ma ana *korosi* ina avarai ma in-

avo taḡotaḡoiu.†† 35 Aiai ravana ana lawana etata jijini, ina vineboai. Ma aiai da ana lawana i verenei; tau ma **Riwana Aiaina** au baina. Tauna ana lawana ina vai-melei. 36 Mepa da aiai: wei dobuna lawanana ma vigulauna ina vai pai; ma lawana Godei ina vineboai. Wei vigulauna, tauna menanare ina agunei? 37 Wate aiwai ei am lawana ma gimara melei. 38 Mepa da aiai: tau ma au viararamana inavi nimalei; ma i mae puputeu; ma ana ḡoanei kaua apoapoe ina kaukauei. **Rava Natuna**, tauna in-avi nimalei maranaina ina nememei; Amana ana au boruma **anela** vivivirei maiteni.”

**9** Ma Iesu, tau i riwei, “Taumi a ririwana kauemi, rava ḡelaumi weka o maimairi amapo eḡa ona iraḡe da God ana vigulau ona inana ina rewapanana ina nei.”

### Iesu inanana i virai

(Mat 17:1-13; Luk 9:28-36)

<sup>2</sup> Au pom six muriai, Iesu, Peter, James ma John i taravaini. Ma tau i ava i ḡae ola ḡaeḡaena au tepana. Ma kampa tau i matai, Iesu inanana i virai. <sup>3</sup> Ana gara i arapoiara ma gamrina ivi mata kamokamota; eḡa me aiwai ḡelauna au dobu nanare. <sup>4</sup> Ma kampa au matai, Elijah ma Moses i eḡa. Ma Iesu maiteni i bababani. <sup>5</sup> Ma Peter Iesu i riwei, “Taviararamana, i ai da tauta weka. Mavi aninelai da numakweta tonuḡa ana voai: tagogi tam au baim, ḡelauna Moses ma ḡelauna Elijah!” <sup>6</sup> Ma tau i rovo kaua ma Peter eḡa ita aramanei da aiwai i latolatoni.

<sup>7</sup> Anina ma apau i eḡa ma tau i purui. Ma pona apauei i opu ma i riwa i pa, “Wei Tau Natu au nuavainana, ona rau-taniḡanei!” <sup>8</sup> Maratagogi tau i inana viravira ma eḡa aiai ḡelauna ita inana ma Iesu, tauna ava.

<sup>9</sup> Ma maranai olei i ḡaiḡairai ma Iesu, tau i ivi ḡaei da aiwai i inananaia eḡa in-avi eḡai da au naona **Rava Natuna** iraḡelei inavo mairi me.

<sup>10</sup> Ma tau i, Iesu riwana ivo teletelei ma i babani vivira i pa, “Iraḡelei vomairi me anona aiwai?” <sup>11</sup> Ma tau i, tauna ivi taravivirei i pa, “Aiwai au baina, **Tarawatu Babadai** e ririwa da Elijah au naona ina nei?”<sup>¶¶</sup>

<sup>12</sup> Iesu i paribelei, “Riwa kaua Elijah au naona ina nei da aiwai anatapuna in-avo kaukauei. Aiwai au baina wariḡa i girumi da **Rava Natuna** ina vinua-apoapoe kaua ma ina inana geduaiei.<sup>p</sup> <sup>13</sup> Wate a ririwana kauemi da Elijah anina i nei ma rava, rava ai ḡoanei tauna i rau-iviapoapoelele me i girugirumia nanare.”<sup>§§</sup>

### Iesu arua-apoapoena tevera orotona awarina ivi opuni

(Mat 17:14-21; Luk 9:37-43a)

<sup>14</sup> Iesu ana tauvotaḡotaḡo tonuḡa maiteni olei i ḡaira memei. Ai rava awari ma patara ḡaeḡaena, tau i gariḡuruvi. Ma *Jew* ai Tarawatu Babadai, tau i maiteni

††**8:34** Wei lamna awanaina. Anona lamna Iesu ana tauvotaḡotaḡo anina vinimala ma apoapoei ina nelaḡai au baina tau i, tauna ivo taḡotaḡoi. Tauna eḡa ita ririwa da ana tauvotaḡotaḡo au korosi ina iraḡe me tauna.

¶¶**9:11** Mai *Jew* ivi tumaḡana da *Elijah au naona ina nememei ma* Keriso muriai ita nei. (Mal 3:1, 4:5-6). Ma tau i eḡa ita notai da Elijah rau-iviapoapoe ina nelaḡai ana au nememei.

§§**9:13** Iesu lamna John Taubabataito i bababaniei da tauna Elijah. (Mat 11:13-14, 17:10-13)

ivivi tarapiri. <sup>15</sup> Maranai patara, Iesu i inanai. Tau i orai i auepai ma awarina i ruba ma ivi egualauei. <sup>16</sup> Iesu, tau i ivi taravirevirei, “Aiwai ovi tarapiriei?”

<sup>17</sup> Oroto tagogi patara au poui i paribelana, “Tauviararamana, **arua-apoapoena** natu orotona au orana e mamae ma i kauai da ega ita bababani, lamna au baina a neiai awarim. <sup>18</sup> Maranai ana doria e ururu melei, lamna arua-apoapoena: tauna au doa e tawatawanei; gamona evivi puropuro; ivona e utauta giri-giriei; ma inina e badobado. Am **Tauvotaḡotaḡo** avi baḡai da arua-apoapoena itavi opuni, wate ega tagotagogina da ita kauai.”

<sup>19</sup> Ma Iesu i paribelei, “O mara aiwai **onavi tumaḡana!** Ta mae gaḡa ma ami vita ana avara gaḡalei? Tevera awariu ona neiai!”

<sup>20</sup> Ma tevera i neiai Iesu awarina. Ma maranai arua-apoapoena, Iesu i inanai, maratagogi tevera ivi aikwajiana guratei da au doa i tonei ma ivi tatauvira ma ivivi puropuro. <sup>21</sup> Iesu, tevera amana ivi taravirevirei, “Wei teverana ana doria mara aiwai ivi karei?”

I paribelei i pa, “Maranai tauna aburunai. <sup>22</sup> Arua-apoapoena mara au anatapuna, tauna ai au araratana ma au waira e tawatawanei ma i goei da itavi raḡeni. Mepa da tam tagotagogina ma rau-nuapoapelelai ma ma voagui!”

<sup>23</sup> Iesu, tauna i riwei, “Menanare da u riwa, ‘Mepa da tam tagotagogina?’ Aiai ravana evivi tumaḡana, God anatapuna ina kauai tauna au baina.”

<sup>24</sup> Maratagogi tevera amana i garara, “**Avi tumaḡana,** wate au tumaḡana ega ita rata ma ma voagui da ina rata!”

<sup>25</sup> Iesu i inana da patara i rierieiai awarii ma lamna au baina arua-apoapoena i egari i pa, “Tam arua taniḡa-potapotana ma gungum. Tau a egaegarim da tevera ma oputawanei. Ma ega melanai tauna au orana ma rui me!”

<sup>26</sup> Ma **arua** i garara ma tevera ivi aikwajiana guratei ma i oputawaneii. Ma tevera inanana me taubeu. Ma rava maḡamaḡau kampa i riwa, “Tauna i iraḡe!” <sup>27</sup> Ma Iesu, tauna urana ivo jijini ma i sinaepai da i mairi.

<sup>28</sup> Muriai Iesu, ana tauvotaḡotaḡo maiteni i rui au numa. Ma maranai tau i ava ma i paridadanei i pa, “Aiwai au baina tauai ega tagotagogina da arua-apoapoena atavi opuni?”

<sup>29</sup> Iesu, tau i riwei, “Arua-apoapoei wenanare, pari ainelana inavi opuni.”

### Iesu ana iraḡe i babaniana melei

(Mat 17:22-23; Luk 9:43b-45)

<sup>30</sup> Iesu, ana tauvotaḡotaḡo maiteni dobuna i netawanei ma **Galili** i verautuini. Iesu ega ita goei da rava ita aramanei da tau i mepa. <sup>31</sup> Au baina tauna, ana tauvotaḡotaḡo ivi araramani i pa, “Tau i **Rava Natuna** ina amverenei rava ḡelau i urai. Ma tau i inavi raḡeni. Wate au pom tonuḡa au murina inavo mairi me.”

<sup>32</sup> Wate tau i ega ita aramanei tauna aiwai i bababaniei. Ma tau i paridadanana i rovoei.

### Tauvotaḡotaḡo ivi tarapiri vivira da aiai i ḡetelara

(Mat 18:1-5; Luk 9:46-48)

<sup>33</sup> Iesu ma ana tauvotaḡotaḡo i ḡeta au **Kapenaum** ma au numa i rui. Ma Iesu, tau i taravirevirei, “Au etanai aiwai ovi tarapiriei?”

<sup>34</sup> Wate tau i genuana au baina au etanai tau ivi tarapiri vivira da aiai i ġetelara. <sup>35</sup> Iesu i kiala ma tau i 12 i rau-kwatuei awarina ma i riwei i pa, “Aiai e ġoeġoe da inavi bada. Tauna ina tereġairana mele i inavi muri dewadewa ma inavi taunola rava au bai.”

<sup>36</sup> Ma Iesu, tevera i vaia ma au poui ivi mairini. Ma tauna, urana au jġona i tere-taġonei. Ma tau i riwei i pa, <sup>37</sup> “Aiai ravana; tau wavauei, tevera wenanare i rau-ġorei. Lamna tau maiteni e rarau-ġoreiu. Ma aiai da tau e rarau-ġoreiu. Lamna tau-paritawaneu maiteni e rarau-ġorei.”

### Aiai eġa ata ġavia, lamna turata

(Luk 9:49-50)

<sup>38</sup> Anina ma John, Iesu i riwei, “Tauviararamana! Tauai, oroto tagogi a inanai; tam wavamei arua-apoapoeni ivivi opuni ma tauna eġa turata. Lamna au baina avi ġaei da eġa ina kauana mele.”

<sup>39</sup> Iesu i riwa, “Eġa ona viġaei! Eġa aiai au wavau **kaua babai** ina kau i ma muriai ina parivai-apoapoeniu. <sup>40</sup> Aiai ravana eġa ata ġavia; lamna turata. <sup>41</sup> Tau a ririwana kauemi. Mepa da aiai ravana, waira i veremi tau au wavau; au baina taumi au Tauvotaġotaġo. Tau i ai maia eġa ina vineboai.”

### Raelara babanina

(Mat 18:6-9; Luk 17:1-2)

<sup>42</sup> Mepa da aiai ravana i kau i da wei teverana ana tumaġana tau awariu ivi apoapoeni da ġoa-apoapoe i kau i. God, tauna ina kovoġa guratei. Eġa me ġaima ġaeġaena, rava au uatabana ina duri ma au boga ina tawane. <sup>43-44</sup> Mepa da nimam i kauem da ġoa-apoapoe u kau i. Ma bori-tawane! I ai da nimam tagogi ava ma lawana ma mae nonoana ma vaia. Ma eġa ma kau i da nimam ruaġa aiaii ma ma nae ai au menamenana; mepa ai eġa melanai ita bobo.\* <sup>45-46</sup> Mepa da aem i kauem da ġoa-apoapoeni u kau i. Ma bori tawane! I ai da sigesigem au lawana ma mae nonoana ma rui. Eġa me aem ruaġa aiaina ma ai au menamenana ina tawanem.† <sup>47</sup> Ma mepa da matam ina kauem da ġoa-apoapoeni u kau i. Ma vaitawane! I ai da matam tagogi ma God ana vigulau ma rui. Eġa me matam ruaġa ma ai au menamenana ina tawanem; <sup>48</sup> dobuna motamotana eġa ita irairaġe ma ai eġa ita bobo.‡

<sup>49</sup> Au Tauvotaġotaġo anataputapui, ai araratane i ina bogai.†

<sup>50</sup> “Nia i ai lam viaiainana au baina. Ma mepa da i tomatoma, mena ma vidagianei. Nia au orami ina mae ma onavi turana vivira!”

### Iesu tavine vilamonana i babaniei

**10** Ma Iesu, dobuna i netawane ma i nae **Judia** ana au parata. Ma Waira *Jordan* i damani da au baba ġelauna. Patara ġaeġaena i riana mele. Ma Iesu ivi araramana, me mara patapatana i kaukauei nanare.

\*9:43-44 Wariaġa nimaiei i giruma damane i tau riwana tagogina me v 48.

†9:45-46 Wariaġa nimaiei i giruma damane i tau riwana tagogina me v 48.

‡9:48 Isa 66:24 †9:49 Lev 2:13

<sup>2</sup>Ma **Farisi** gēlauri i gōei da tauna ita waroi. Ma lamna au baina ivi taravirevirei, “**Tarawatu** e mamae bo ega da rava, awana maiteni itavi lamonei?”

<sup>3</sup>Ma Iesu i paribelei, “Moses ana **Tarawatu** aiwai e ririwei?”

<sup>4</sup>Ma tau i riwa, “Moses ana **Tarawatu** e ririwa da oroto ‘*vilamona pepana ina girumi ma awana ina verei. Ma tau i navi lamonei.*’”<sup>s</sup>

<sup>5</sup>Iesu i paribelei, “Taumi orami i pota. Au baina Moses wei Tarawatuna i terei.

<sup>6</sup>Wate ona notai da au karena, maranai God rava i kauei ‘*ma tauna oroto ma wavine i kauei.*’<sup>t</sup> <sup>7</sup>Ma lamna au baina oroto amana ma alona ina netawanei<sup>8</sup> ma awana maiteni i navi tagogi<sup>u</sup> da tau i ega ruağa me au naona ma tupua tagogi. <sup>9</sup>God aiwai ivi tagogiei, ega aiwai i navi lamonei.”

<sup>10</sup>Maranai tau i naeme au numa, ma **Tauvotağotağō**, Iesu ivi taravirevirei wei kauai au baii. <sup>11</sup>Iesu i paribelei, “Mepa da oroto, awana ivo terei. Ma wavine gēlauna i ravaği. Lamna tauna, awana awarina i rau-iviapoapoe. <sup>12</sup>Ma nanarena mepa da wavine, oroto ivo terei ma oroto gēlauna i ravaği. Lamna tauna, awarina i rau-iviapoapoe.”

### Iesu, roaroa muomuoi ivi aiaini

<sup>13</sup>Rava gēlauri, roaroa i neiai Iesu awarina da urana au tepai ita terei. Ma ana tauvotağotağō, ravai ivi gaei. <sup>14</sup>Maranai Iesu wei kauai i inanai. Ma ana tauvotağotağō i eni ma i riwa, “Roaroa onavo terei da awariu ina nei. Ma ega ona viğaei. Au baina God ana vigulau, lamna rava wenanare au bai me wei roaroai. <sup>15</sup>A ririwana kauemi. Aiwei, God ana vigulau ega ina vaia me tevera aburuna nanare. Tauna, ega God ana au vigulau ina rui. <sup>16</sup>Ma roaroa i taravaini ma i rapai, urana au tepai i terei, i raupari ma ivi aiaini.

### Purapura ravana, Iesu i paridadanei lawana mamae nonoana au baina

(*Mat 19:16-30; Luk 18:18-30*)

<sup>17</sup>Ma maranai Iesu ivo mairi da i nena. Orotō i ruba gēta ma au naona i raudune ma i riwa i pa, “Tauviararamana vivinualaulaunam. Aiwei ana kauei da lawana mamae nonoana ana vibuderiei?”

<sup>18</sup>Ma Iesu i paribelei i pa, “Aiwei au baina, tau uvi kua vivinualaulauneu? God, tauna ava vivinualaulaunana. <sup>19</sup>Tam, God ana **Tarawatu** u aramanei: ‘*Eğa mavi rağena! Eğa ma awadanene! Eğa ma danene! Eğa mavi wavumoru! Eğa ma amkwalakwala! Amam ma Alom ma vivirei!*’<sup>v</sup>

<sup>20</sup>Ma tauna i riwei, “Tauviararamana! Maranai tau aburueu da amadodo, wei Tarawatui anapui avo teletelei.”

<sup>21</sup>Iesu, tauna i inanai ma ivi nuavaini ma i riwei, “Kaua tagogi e mamae ega uta kaukauei. Ma nae ma am purapura anapuna ma gimarei. Ma manena, rava molamolakai ma verei. Ma au mara God, tam i navi maiem. Ma ma nei ma mavo tağotağoiu!”

<sup>22</sup>Ma maranai oroto wei riwana i nonori. Naona i peu ma ana nuabolana i nae; au baina tauna, purapura ravana.

<sup>s</sup>10:4 Deu 24:1-4; Mat 5:31    <sup>t</sup>10:6 Gen 1:27; 5:2    <sup>u</sup>10:8 Gen 2:24

<sup>v</sup>10:19 Exo 20:12-16; Deu 5:16-20

<sup>23</sup> Iesu i inana viravira ma ana tauvotaḡotaḡo awari i riwa, “I piripiri kaua da purapura ravana, God ana au vigulau ina rui.”

<sup>24</sup> Tauvotaḡotaḡo riwana i baei maranai Iesu wenanare i babani. Ma Iesu i riwa me, “Natunatu! I piripiri kaua da purapura ravana,<sup>‡</sup> God ana au vigulau ina rui. <sup>25</sup> I telatela kaua da ḡamoḡamo ḡaēḡaena wavana kamel, iḡoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna inavi badei.”

<sup>26</sup> Tau i vi nuanaina ma ai nota i kwa. Ma tau i ava i babani vivira i pa, “Mepa da nanare; amapo aiai lawana mamae nonoana ina vaia?”<sup>¶</sup>

<sup>27</sup> Iesu awarii i inana ma i riwei, “Rava awarii wei kauai i piripiri. Wate eḡa God awarina. God awarina aiwai anatapuna i telatela kaua.”

<sup>28</sup> Ma Peter i riwei, “Ma tauai menanare? Tauai ai purapura avo terei ma tam avo taḡoim.”<sup>§</sup>

<sup>29</sup> Iesu i paribelana, “A ririwana kauemi. Aiai da ana numa bo varevareina bo novunovuna bo alona bo amana bo natunatuna bo ana wapu inavo terei ma tau inavo taḡotaḡoiu; tau ma **Riwana Aiaina** au baina. <sup>30</sup> Tauna ana maia ina rata kaua wei au dobuna. Tauna ana maia inavi aitepatepani da ana numa, varevareina, novunovuna, alona, natunatuna ma ana wapu, anatapui ina maḡa. Rava ina rau-iviapoapoelem; au baina tam, tau au Tauvotaḡotaḡo da mara au murina tauna lawana mamae nonoana ina vaia. <sup>31</sup> Wate maḡamaḡau marina evi vinao; tau i in-avi muri. Ma maḡamaḡau da evivi muri; ina vinao.

### Iesu ana iraḡe babainina ivi tonui

(Mat 20:17-19; Luk 18:31-33)

<sup>32</sup> Iesu, ana tauvotaḡotaḡo maiteni i ḡeḡae au *Jerusalem*. Iesu, tau i au naoi i nena. tauvotaḡotaḡo i baei. Ma rava ḡelau i au muri i nenei i rovo kaua.<sup>\*\*</sup> Ma tau i 12 i rau-ḡorei au ririva ma i rau-karei da kaua amapo awarina ina tupua; tau i vi eḡei <sup>33</sup> I pa, “Ona inana, tauta ta ḡeḡae au *Jerusalem*. Ma **Rava Natuna** ina verenei **Pirisi Babadai** ma **Tarawatu Babadai** awarii. Ma tau i ana iraḡe inavi aninei. Ma **dobu ravai** ina verei. <sup>34</sup> Ma tauna inavi jiboḡi ma ina ovai ma ina kwapui ma inavi raḡeni. Au pom vitonuina inavo mairi me.”

### James ma John ai vibaḡa

(Mat 20:20-28)

<sup>35</sup> James ma John, *Sebidi* natunatuna i nei Iesu awarina ma ivi baḡai i pa, “Tau-riaramana! Tauai ai ḡoana avivi baḡei uta kauai.”

<sup>‡</sup>10:24 Wei riwana buka ḡelau awarii e mamae ma ḡelau eḡa [purapura ravana].

<sup>¶</sup>10:26 Mai Jew i notai da rava vipurapurai lamna God ana verena ana nuavaina matairana, tau i e notai da God rava vipurapurai eḡa ina gagaloēi, tauna ravai ḡelau maiteni eḡa ina gagaloēi.

<sup>§</sup>10:28 Peter i ḡoēi da ita aramane i da Tauvotaḡotaḡo ai au iraḡe maiana aiwai, ina vaia.

<sup>\*\*</sup>10:32 Iesu i ḡeḡae au *Jerusalem* ma rava maḡamaḡau ivi ḡaviei ma lamna au baina ana tauvotaḡotaḡo i baei da tauna tepana i tora da tauna weka i nena. Rava ḡelau i vo taḡotaḡo, tau i rovo kaua da aiwai awarina ina tupua maranai i ḡeta au *Jerusalem*.



<sup>36</sup> Iesu i riwa i pa, “Aiwai o gōeḡoei ana kauēi au baimi?”

<sup>37</sup> Tauī i paribelana, “Ma verelai da ana kiala, tagogi au oim ma ḡelauna au kelakelaum am au vigilau.”

<sup>38</sup> Iesu i paribelei, “Tauī eḡa ota aramanei aiwai ovivi baḡei! Iniviara kelakana ana umai. Tauī tagotagogina da ona umai bo? Tagotagogina ona babataito me tau ina babataitoi?††”

<sup>39</sup> “Tauī tagotagogina!” tauī i paribelana.

Iesu, tauī i riwei, “Iniviara kelakana anina ona umai ma ona iraḡe me tau ana iraḡe. <sup>40</sup> Wate tau au rewapana eḡa ita mamae da ana veremi da mepa ona kiala au oiū bo au kelakelau. God, rava ivi nevinei; tauī ai gabu ivo kaukauei.”

<sup>41</sup> Maranai Tauvotaḡotaḡo 10 ḡelauī, wei riwana i nonori. Tauī James ma John awarii i ḡaiawa. <sup>42</sup> Ma Iesu, tauī anapui i ḡorei da awarina ma i riwei, “O aramanei da dobu ravai ai babada, dobu ḡela ravai awarii e mamae ḡaeḡae ma e rarau-iviapoapelei. Wate tauī ai babada ḡaeḡaei, ai rewapana i ḡetelera da ai rava evi badebadei da ai ḡoana e kaukauei. <sup>43</sup> Wate au tauvotaḡotaḡo eḡa nanare. Eḡa da aiai i ḡoei da ina ḡetelara tauī au poumi; tauna anina inavi taunola. <sup>44</sup> Aiai i ḡoei da ita vinao. Tauna inavi taunola rava anapui au bai. <sup>45</sup> Ma nanare **Rava Natuna** eḡa ita nei da tauna, tata nolei. Wate itavi taunola rava au baii. Ma ana lawana ita verenei da rava maḡamaḡau ai lawana ita gimara meleī.‡‡

### Iesu, rava matapotapotana Bartimeus ivi lawani

(Luk 18:35-43)

<sup>46</sup> Ma tauī i ḡeta au *Jeriko*. Iesu, ana tauvotaḡotaḡo, patara ḡaeḡaena maiteni dobuna i opuoputawaneii. Maranai oroto matapotapotana, wavana *Batimeus*, *Timeus* natuna au etanai i kiakiala ma i viam-gigimana. <sup>47</sup> Maranai i nonori da tauna, Iesu *Nasaretei*; garara i rau-karei i pa, “Iesu, tam **David** natuna! Ma rau-nuapoapeleu!”¶¶

<sup>48</sup> Rava maḡamaḡauī, tauna i rai ma i riwei da ita genuana. Wate tauna, garara ivo guratei, “David Natuna! Ma rau-nuapoapeleu!”

<sup>49</sup> Iesu i tumairi ma i pa, “Ona ḡoreiai!”

Anina tauī, matapotapotana i ḡoreiai i pa, “Tepam ina tora ma mavo mairi! e ḡoreḡorem!”

<sup>50</sup> Tauna, ana puru i tawanei ma ivo mairi laḡilaḡina ma i nei Iesu awarina.

<sup>51</sup> Iesu i paridadana i pa, “Aiwai u ḡoei ana kauēi au baim?”

Matapotapotana i paribelei, “Tauviararamana! A ḡoei da ana inana me.”

<sup>52</sup> Iesu i riwa, “Ma nae! Am tumaḡana ivi lawanim.” Maratagogi tauna i inana me ma Iesu au eta ivo taḡotaḡoi.

---

††**10:38** “babataito me tau ina babataitoi” tauī iniviara ma iraḡe e bababaniei, maranai Iesu au Getsemani i raraupari muriai da ana iraḡe tauna ana nuabolana kelaka i babaniei (Mrk 14:36) Iesu James ma John i riwei da nuabola ina nelaḡai.

‡‡**10:45** Iesu ivi nuapoapoe ma iraḡe au baita me Isaiah i girugirumia nanare au Is 52:13-53:12

¶¶**10:47** Maranai oroto matapotapotana Iesu i kwatuei “David natuna” ma mai *Jew* i aramanei Keriso God ana vinevine i babaniei. Mai *Jew* i aramanei da Keriso, God ana vinevine i nei da rava doridoriai itavi lawani me tauī ai wavalatona me David wariḡa nanare. (Ps 89:3-37, Is 29:18-19, 35:5-6; Je 23:5-6, Ez 34:23-24).

### Iesu i rui au Jerusalem

(Mat 21:1-11; Luk 19:28-40; Jhn 12:12-19)

**11** Ma maranai *Jerusalem* i tuġereġerei ma i rui au *Bet-Fagi* ma *Bet-Ani*<sup>§§</sup> au ola *Olives*. Ma ana tauvotaġotaġo ruaġa i paritawanei,<sup>2</sup> ma i riwei i pa, “Ona nae au melagai au naomi. Maranai o ruirui, kampa *donki* natuna ġaubo, raġiraġitana ona nelaġai. Tauna eġa aiai ita geru dadanei. Ona rupeni ma ona neiai.\*<sup>3</sup> Mepa da rava aiai ina paridadana, ‘Aiwai au baina wei o kaukauei?’ Ona riwei, ‘Bada e ġoġoġei ma maratagogi ina paritawana melei.’”

<sup>4</sup> Ma i nae ma *donki* natuna au doa au metaeta raġiraġitana i rupeni.<sup>5</sup> Rava ġelau kampa i maimairi i paridadana i pa, “Aiwai o kaukauei *donki* natuna o ruperupeni?”

<sup>6</sup> Ma i paribelei me Iesu i ririweia nanare ma tau i ivo terei da i nae.<sup>7</sup> Tau *donki* i neiai Iesu awarina ma ai puru au uporana i tawana epai ma au tepana Iesu i kiala.<sup>w</sup>

<sup>8</sup> Ma rava maġamaġau, ai puru au eta i ebani ma ġelau, ai rugurugu i taratarai i ebani.<sup>9</sup> Tau i vi vnao ma tau i muri i nenei i garara:

“*Hosanna!*”<sup>†</sup>

“*Viviaiainana tauna Bada au wavana e nenei!*”

<sup>10</sup> “*Viviaiainana amata David ana vigulau e nenei!*”

“*Hosanna au aidamo telerana!*”

<sup>11</sup> Iesu i ġeta au *Jerusalem* ma i rui au Tempol ma anatapuna i tuvirevirei ma au i biga au baina, i opu me au *Bet-Ani*, tau 12 maiteni.

### Iesu damala aina i parivai-irairagēni

(Mat 21:18-19)

<sup>12</sup> Ma marana i tom, tau *Bet-Ani* i oputawaneii ma Iesu am-iraġe.<sup>13</sup> Au weia ma damala aina i inanai ana ruguruguna. Ma i nae da ita inanai da i ua bo eġa. Maranai kampa i ġeta, eġa aiwai ita nelaġai. Anina ai ruguruguna ava, au baina eġa damala ana mara.<sup>14</sup> Iesu, damala aina i riwei i pa, “Eġa aiai amadodo ma amapo anom ina am melei!” Ma ana tauvotaġotaġo i nonori aiwai i latoni.

### Iesu, Taugimara Tempolei ivi aġaġana opunei

(Mat 21:12-17; Luk 19:45-48; Jhn 2:13-22)

<sup>15</sup> Maranai tau i ġeta au *Jerusalem*, Iesu i rui Tempol ana au gari ma taugimara ivi aġaġana opunei, mane tauviraina<sup>‡</sup> ai kepakepa ma gabubu taugimareina ai anikiala ivi tauvirai.<sup>16</sup> Ma ivi ġaei da eġa aiai ana gimara au Tempol garina

§§11:1 Eng. Bethphage & Bethany.

\*11:2 Mai *Jew* awari, *donki* lamna nola au baina ma eġa gulau ana anigeru. Donki i gerui lamna e ririweta da tauna gulau ana nuaubana ma vilamolamonana i nei.

†11:9 lamna pona Aram anona ‘ma vilawaniai’ ma muriai lamna vieġualau ma vi-maeġaeġaena au baina. Ps 118 ona inanai.

‡11:15 Mai *Jews* ai au nota da mai Rome ma mai Greece aruai mane au tepana i terei, wei mai *Jew* awari lamna God morumoruna. Mane tauviraina au Tempol mane dobu ġelau i virai da Tempol mane wei lamna *Jew* tarawatu ivi aninei gimara au Tempol au baina (Exo 30.13).

<sup>w</sup>11:7 2 Kgs 9:12-13

ita avarai naiei. <sup>17</sup> Ma rava ivi araramani i pa, “I girugirumia nanare, ‘Au numa ina ġorei pari au numana dobu ravai anatapui au baii.’<sup>x</sup>

Wate taumi ovo virai da kwalakwalai ai guba.”<sup>¶ §</sup>

<sup>18</sup> **Pirisi Babadai** ma **Tarawatu Babadai** i nonori ma i ogei da itavi raġeni. Taui, Iesu i rovoei au baina patara ana viararamana i baei.

<sup>19</sup> Ma au bigai taui, *Jerusalem* i oputawanei.

### Damala aina i poi

(*Mat 21:20-22*)

<sup>20</sup> Ma ubaubanai taui i nenia ma damala aina i inanai anatapuna i poi. <sup>21</sup> Peter i notai ma i riwa “Tauviararamana ma inana! Damala aina u parivai-irairaġenia i poi.”

<sup>22</sup> Iesu i paribelei, “God onavi tumaġanei! <sup>23</sup> A ririwana kauemi. Rava wei olana ita riwei, ‘Mavo mairi ma au boga ma tawanem!’ Ma nuanuana eġa ina raġaraġa ma tumaġana da aiwai e ririweia, ina tupua tauna au baina. <sup>24</sup> Lamna au baina a ririwemi. Aiwai au pari ovi baġei, **onavi tumaġana** da taumi boiboġi o vaia ma inavi ġarimiei. <sup>25-26</sup> Ma maranai e raraupari, au naona rava anatapui ai apoapoe awarim ma nota-tawanei. Ma nanare amam au mara am apoapoe ina nota-tawanei.”<sup>\*\*</sup>

### Jew babadai, Iesu ana vibadana ivi tarapiriei

(*Mat 21:23-27; Luk 20:1-8*)

<sup>27</sup> Taui i nememei au *Jerusalem* ma Tempol ana au gari Iesu i bababara. Ma Pirisi Babadai, Tarawatu Babadai ma dogadogara i nei tauna awarina. <sup>28</sup> Ma Iesu i paridadanei i pa, “Aiwai vibadanei wei kauai e kaukauei? Aiai vibadana i verem da wei kauai uta kauiei?”

<sup>29</sup> Iesu i paribelei i pa, “Au vitaraviravira tagogi ana terei ma ona paribeleu. Ma ana riwemi; aiwai vibadanei wei kauai a kaukauei. <sup>30</sup> Aiai, John Taubabataito vibadana i verei da rava ita babataitoi, God bo rava? Ona riweu!”

<sup>31</sup> Taui ivi tarapiri vivira, “Mepa da tana riwa, ‘Godei.’ Tauna ina riwa, ‘Ma aiwai au baina eġa otavi tumaġanei?’ <sup>32</sup> Wate eġa tana riwa da, ‘Ravei.’” Taui rava i rovoei, au baina rava anatapui, ai nota da John anina **peroveta**.<sup>y</sup> <sup>33</sup> Ma i paribelei, “Tauai eġa ata aramanei.” Iesu i riwa, “Tau nanare eġa ana riwemi aiwai vibadanei wei kauai a kaukauei.”

---

<sup>¶</sup>11:17 Jer 7:11-15

<sup>§</sup>11:17 Iesu dobuġela manena tauviraina ma uneune ravai ivi wavui da taui pari numana ivo virai da am-kwalakwalai ai guba, taui rava ai arua nolana evivi apoapoeni Jer 7:11-15.

<sup>\*\*</sup>11:25-26 riwa wadubo nonoana uraiei i girugirumia v 26 weka eġa ita mamae, (Mepa da rava ai apoapoei eġa ma nota-tawanei, amam au mara nanare am apoapoei eġa ina nota-tawanei).

<sup>x</sup>11:17 Isa 56:7      <sup>y</sup>11:32 Luk 20:6

## Tauipi ai awanaina

(Mat 21:33-46; Luk 20:9-19)

**12** Iesu ivi karei ma awanainei awari i babani i pa, “Mara tagogi oroto, ana wapu i kauēi ma grape i paewi<sup>††</sup> ma i gari ma grape anigudana ma violaḡa numana i voai. Ma tauipi ḡelau i verei da ita nolei tauī anapui au bai. Ma i vaḡai au dobu ḡela. <sup>2</sup>Tuaruta ana mara i ḡetai ma taniwaga, ana taunola i paritawaneī tauipi awariī da ana ḡuta ita vaia. <sup>3</sup>Wate tauipi, tauna ivo jijini ma i kwapui ma kwakwavina i paritawaneī. <sup>4</sup>Ma taniwaga, taunola ḡelauna i paritawaneī. Ma tauī, kolana ivi aibauni ma ivi tepaubaubai. <sup>5</sup>Ma taunola ḡelauna i paritawaneī ma tauna ivi raḡeni ma i maḡa ḡelau i paritawaneī, ḡelau i kwapui ma ḡelau ivi raḡeni.<sup>‡‡</sup> <sup>6</sup>Ma tagogi ava e mamae da ina paritawaneī. Lamna natuna orotona tagotago ana nu-avainana. Ma tauna au murioina i paritawaneī ma i pa, ‘Tauī, natu ina vivirei.’<sup>z</sup> <sup>7</sup>Wate tauī, tauna i inanai i ma i riwa vivira i pa, ‘Wei taniwaga natuna. Ona nei, tanavi raḡeni ma ana buderi inavi ḡaritaieī!’ <sup>8</sup>Ma i vunui ma ivi raḡeni ma tupuana wapuei i tawanana opunei.

<sup>9</sup>“Wapu taniwagana marina aiwai ina kauēi tauī awariī? Tauna ina nei ma tauipi inavi raḡeni ma grape wapuna ina veredamaneī tauipi ḡelauī awari.<sup>a</sup> <sup>10</sup>Wei giru-mana o iavi bo eḡa?

*‘Wei ḡaimana, tauvoa i geduaieī, wate muriai i nelaḡai da tauna ḡaima kaua.*

<sup>11</sup> *Wei lamna, Bada ana kaua ma inanana ivi nualaulauna.’” (Psa 118:22-23)*

<sup>12</sup> *Jew* babadai i aramaneī da awanaina lamna tauī i bababanieī ma lamna au baina i ḡoei da ita pani. Wate tauī patara i rovoei, lamna au baina Iesu ivo terei ma i nae.

## Sisa awarina tax tana terei bo eḡa?

(Mat 22:15-22; Luk 20:20-26)

<sup>13</sup>Ma **Farisi** ḡelauī ma Herod ana rava ḡelauī i nae Iesu awarina da riwei ita waroi. <sup>14</sup>Tauī i nei ma i riwa, “Taufiararamana, tauai aramaneī da tam rava jijimanim. Ma rava wavai naenaēi ma rava labalababa eḡa uta vibainaenaēi ma anapui e vaivaia da tagogi. Wate tam God ana babani riwa kauēi evi araramani. Ma riwelai tax tana terei Rome gulauna wavana **Sisa**<sup>¶¶</sup> awarina, i ai bo eḡa?”

<sup>15</sup>Wate Iesu, ai moru i inana bauni ma i riwei, “Aiwai au baina o rau-dadaniu? Mani tagogi ona neiai da ana inanai!”

<sup>16</sup>*Denarius* tagogi i neiai Iesu awarina ma tauī ivi taravirevirei, “Wei aiāi aruana ma wavana?”

I paribelei, “Sisa.”

<sup>17</sup>Iesu i riwa, “Aiwai *Sisa* ḡarinei, *Sisa* ona verei. Ma aiwai God ḡarinei, God ona verei!” Ma tauī i bai.

<sup>††</sup>12:1 Parivainota wadubona, God au anapuna Israel e bababaniei me tauna ana grape wapuna, me Isa 5:1-2.

<sup>‡‡</sup>12:5 Inana Jeremiah 7:25-26, Amos 3:7 ma Zechariah 1:6.

<sup>¶¶</sup>12:14 Eng. Caesar.

<sup>z</sup>12:6 Mrk 1:11      <sup>a</sup>12:9 Luk 13:34-35

## Sadusi ġelau i Iesu ivi taravirevirei irairaġelei vomairina au baina

(Mat 22:23-33; Luk 20:27-40)

<sup>18</sup> Mai **Sadusi** ai vitumaġana da rava eġa ita vovo mairi-me maranai e irairaġe.<sup>§§</sup> Anina ma ġelau i nei Iesu awarina ma i paridadanei. <sup>19</sup> “Tauviararamana! God ana tarawatu, Moses wenanare i girumi: Mepa da oroto i irაჲe ma kaiababana i netawanei ma eġa natunatui. Orotu vareina kaiababana ina ravaġi ma roaroa ina ġuni vareina au baina.<sup>b</sup> <sup>20</sup> Mara tagogi varevarei seven i mae. Ma natuevou i tavine ma eġa itavi natuna ma oroto i irაჲe. <sup>21</sup> Vareina viruaina kaiababa i ravaġi ma tauna maiteni eġa natuna ma i irაჲe. Ma nanare vareina vitonuina. <sup>22</sup> Ma nanare anatapui seven, wavinena i ravaġi ma eġa natunatui. Au muriai wavine i irაჲe. <sup>23</sup> Anatapui seven, wavinena i ravaġi. Vomairi me au marana, lamna aiai awana?”

<sup>24</sup> Iesu, tau i riwei, “Aiwai Moses i girumi ma God ana rewapana eġa ota aramanei. <sup>25</sup> Maranai tau i irაჲelei inavo mairi, tau i eġa ina tavine bo inavi tavine. Wate ina mae me anela au mara. <sup>26</sup> Ma rava irაჲelei ivo mairi babanina, Moses ana tarawatu eġa ota iavi bo? Mepa ai i araratalana, kampa God Moses i riwei: ‘*Tau Abraham ana God ma Isaac ana God ma Jacob ana God.*’<sup>c</sup> <sup>27</sup> Tauna eġa rava i irairaġei ai God, wate rava lawalawai ai God. Taumi o moru kaua!<sup>\*§</sup>”

## Tarawatu ġeġetelarana

(Mat 22:34-40; Luk 10:25-28)

<sup>28</sup> Ma Tarawatu Badana tagogi i nae ma ai vitarapiri i nonori. Ma i nonori da Iesu i babani kaua, lamna au baina tauna ivi taraviravira, “God ana tarawatu metauna i ġetelara?”

<sup>29</sup> Iesu i paribelei, “Ġeġetelarana tagogi lamna wei: ‘*Ona rau-taniġana Israel! Bada ata God, tauna ava Bada.*’ <sup>30</sup> *Bada ami God nuanuami ina vaia orami anatapunei ma aruami anatapunei ma ami nota anatapunei ma ami rewapana anatapunei!*’<sup>d</sup> <sup>31</sup> Ma viruaina lamna wei: ‘*Rava ġelau nuanuam ina vaia me tam nuanuam e vaivai-melei!*’<sup>e</sup> Wei tarawatui ruaġa i ġetelara, eġa me ġelau nanare.”

<sup>32</sup> Tarawatu badana i riwa, “Tauviararamana u babani kaua! Riwa kaua u babaniei, God ‘*Tagogi ma eġa mepa ġelauna.*’<sup>f</sup> <sup>33</sup> Ma ‘*nuanuami ina vaia orami anatapunei ma ami nota anatapunei ma ami rewapana anatapunei.*’ Ma, ‘*Rava turam nuanuam ina vaia me tam nuanuam e vaivai-melei.*’ Wei tarawatui ruaġa lamna i ġetelera, eġa me pulo apuapunana bo pulo ġelau.”

<sup>34</sup> Iesu i inanai da tauna i paribelana kaua ma i riwei, “Tam, God ana vigulau au ġereġerena e ġeġeta.” Ma eġa aiai tepana ita tora da Iesu itavi taraviravirana melei.

§§**12:18** Sadusi tau i gulagulau ma rava ġaeġaei mai Jew ai giu babadai tau i maiteni eġa itavi tumaġana da **anela bo arua ġelau i e mame ma buka 5 ivi nao, Moses i girugirumia, tau i lamna ava evivi tumaġanei (Gen, Exo, Lev, Num, Deu) ma eġa buka ġelau. Wate Moses ma God riwaiei tau i ivi atataiei da lawana e mame irაჲe au murina.**

\***12:27** ‘wate rava lawalawai ai God’ mepa da God i riwa da tauna Abraham ma Isaac ma Jacob ai God tau i lawalawai maranai God, Moses awarina i babani.

<sup>b</sup>**12:19** Deu 25:5-6

<sup>c</sup>**12:26** Exo 3:6

<sup>d</sup>**12:30** Deu 6:4-5

<sup>e</sup>**12:31** Lev 19:18

<sup>f</sup>**12:32** Deu 4:35

### Keriso tauna aiai?

(Mat 22:41-46; Luk 20:41-44)

<sup>35</sup> Maranai Iesu au Tempol ivi araramana ma ivi taraviravira i pa, “Aiwai au baina **Tarawatu Babadai** e ririwa da **Keriso** tauna **David** natuna? <sup>36</sup> **Arua Vivivireina**, David nota i verei ma tauna i riwa:

*‘Bada au bada i riwei,*

*Au oieu ma kiala*

*da am ġavia*

*au ae-karem ana tuvai-doedoei.’ (Psa 110:1)*

<sup>37</sup> “David, tauoina i ġorei ‘Bada.’ Ma menanare da **Keriso** lamna, David natuna?” Patara ġaeġaena riwana i nonori ma ivi nuaiai.

### Iesu, Tarawatu Babadai ai kaua i babaniei

(Mat 23:1-36; Luk 20:45-47)

<sup>38</sup> Ma Iesu, tau i ivi araramani i pa, “Tarawatu Babadai ona rovoei. Ai gara manamanai ma e bababara nae au deba da rava tau i evivi virei. <sup>39</sup> Tau i anikiala vinevinei **pari au numana** ma au torela, ġabu aiaii e vaivaia. <sup>40</sup> Tau i, kaikaiababa e morumoru ma ai numa e kwalekwalei ma e morumoru ma e raraupari vaimanamanawa. Tau i ai kovoġa ina apoapoe guratana.”

### Kaiababa ana pulo

(Luk 21:1-4)

<sup>41</sup> Ma Iesu, pulo aniterenana au baba ġelauna i kiala ma rava i inanai mane i tereterei. Rava maġamaġau i vivimanei, mane maġamaġau i terei. <sup>42</sup> Wate kaiababa molamolakana i nei ma mane muomuoi ruaġa i terei, ruvana i aburu kaua. <sup>43</sup> Ana **Tauvotaġotaġo** i ġorei ma i riwei, “Anina a ririwemi, wei kaiababa molamolakana i tere guratei, eġa me tau i ġelau i. <sup>44</sup> Tau i ġelau i ai maurei i verena, wate wei kaiababa molaka ma ġarinei anapuna i terei ana anilawana anapuna.

### Iesu i riwa da rava God ana Tempol ina rikai

(Mat 24:1-2; Luk 21:5-6)

**13** Iesu, Tempol i nenetawanei ma ana tauvotaġotaġo tagogi i riwa, “Tauviararamana! Numa ivi ġulau ġaġa ma numa ġaimai i rata ġaġa.”

<sup>2</sup> Iesu i paribelei, “Wei numai ġaeġae u inanai, eġa ġaimai tagogi, turana au tepana ina mae. Ġaima anapui ina rikai.”

### Rava ina vinua-apoapoe kaua. Iesu ana tauvotaġotaġo inavi patutu

(Mat 24:3-14; Luk 21:7-19)

<sup>3</sup> Iesu i kiakiala au ola *Olives*, Tempol au navanavaġela ma Peter, James, John ma Andrew i nei ma ivi taraviravirana govaġei <sup>4</sup> i pa, “Ma riwelai mara aiwai wei kauai ina tupua? Ma aiwai inavi mataira da wei kauai anapui ina tupua?”

<sup>5</sup> Iesu, tau i riwei, “Ona inana kaua da eġa aiai ina tere-vaideġaimi! <sup>6</sup> Rava maġamaġau, au wavau ina nei ma ina riwa, ‘Tau **Keriso**!’ Ma rava maġamaġau ina tere-vaideġai. <sup>7</sup> Ma maranai viġavia ona nonori ma viġavia aueia riwana ona nonori; eġa ona rovo. Wei kauai anina da ina tupua, wate wei eġa damona. <sup>8</sup> Dam, damai

inavi ġavia vivira ma dobu, dobuai inavi ġavia vivira. Ma lolo ma gomara dobu au anatapuna. Wei kauai, lamna me wavine ana iniviara evivi karei maranai evivi natuna.

<sup>9</sup>“Ona inana kaula! Taumi ina panimi ma ina etaremi ma pari au numana au orana ina kwapuimi. Ma dogadogara ma gulagulau au naoi ona mairi, au baina taumi ovo taġotaġoiu. Ma tau awarii, Riwa Aiaina ona rau-gugulei. <sup>10</sup>Riwa Aiaina ona rau-gugulei rava anatapui awari ma muriai damona ina nei. <sup>11</sup>Ma maranai i panimi ma i etaremi. Eġa onavi nuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eġa taumi ota babani, wate **Arua Vivivireina**. <sup>12</sup>Rava, vareina ina verenei da inavi raġeni. Ma ama, natunatuna ina verenei da inavi raġeni. Ma roaroa, amamai ma aloloi inavi ġaviei da ina iraġe. <sup>13</sup>Rava anatapui ina geduaiemi tau au baiu. Wate ai ai da e maimairi jijina da au damona, tauna ina lawana.

### Iniviara ġaeġaena ana mara

(Mat 24:15-28; Luk 21:20-24)

<sup>14</sup>“Maranai ‘Kaua apoapoe kaukauana’<sup>†</sup> e maimairi mepa avena ita mairi. (Buka tau-iavana wei ina aramanei anona aiwai). Tau aiavoi au **Judia** ina ruba laġi-laġina au ola. <sup>15</sup>Aiai numa au tepana eġa ina ġaira bo ina rui au numa da aiwai ina vaia. <sup>16</sup>Aiai au wapu eġa ina nae me au numa da ana gara ina vaia. <sup>17</sup>Ma iniviara ġaeġaena, waivine duaduamai ma tau da evivi ġuġu awari nai au marana! <sup>18</sup>God awarina ona raupari da wei kauai eġa au bodu ina tupua. <sup>19</sup>Ma nai au marana amapo iniviara ġaeġaena. Ma maranai God dobu i kauei, iniviara ġaeġaena eġa nanare ita tupua ma amapo eġa nanare ina tupua me. <sup>20</sup>Wate Bada nai marana inavi tupoi. Mepa da eġa inavi tupoi, rava anatapui ina iraġe. Wate rava, tauna ana vinevine inavi lawani lamna au baina mara inavi tupoi.

<sup>21-22</sup>“Muriai keriso morumorui ma **peroveta** morumorui ina nei ma mataira ma **kaua babai** ina kauei ma ina kauana dadanei da God ana vinevine maiteni ita terevaideġai. Lamna au baina mepa da ai ai ina riwemi, ‘Ma inanai, **Keriso** noi!’ bo ‘Tauna noi!’ Nai babanina eġa onavi tumaġanei! <sup>23</sup>Ona inana kaula; anatapuna a riwana nonoemi!”

### Rava Natuna ana nei

(Mat 24:29-31; Luk 21:25-28)

<sup>24</sup>Iesu wenanare i riwa, “Ma iniviara ġaeġaena au murina. *‘Madeġa eġa ina rarana*

*ma nawaravi eġa ina lalai.’* (Isa 13:10)

<sup>25</sup>*‘Ma ubona marei ina peu*

*ma rewapanana ġelau au aidamo ina gui.’* (Isa 34:4)

<sup>26</sup>“Nai maranaina, ‘Rava Natuna ana rewapanana ma ana borumana apau ei ina nei.’”

<sup>27</sup>Ma Tauna, ana **anela** ina paritawanei dobu au anatapuna da rava tauna ana vinevine ina tuarui dobu au damona da dobu ġela au damona.”

<sup>†</sup>13:14 Eng. *Abomination of Desolation* Dan 9:27, 11:31, and 12:11

<sup>§</sup>13:26 Dan 7:13

### Damala ana awanaina

(Mat 24:32-35; Luk 21:29-33)

<sup>28</sup>“Damala aina ana awanaina ona aramanei. Maranai ai e numonumoi, lamna ona aramanei da maura e tuturiai. <sup>29</sup>Ma nanare, maranai wei kauai anapupui ina tuputupua, ona aramanei da **Rava Natuna** i turiai; au metaeta i ġetai. <sup>30</sup>Anina a ririwemi da wei kauai au naona ina tupua ma muriai da rava marina lawalawaii ina iraġe. <sup>31</sup>Mara ma dobu ina amoa. Wate riwau eġa ina amoa.”

### Tana vokaukaua Iesu ina nememei au baina

(Mat 24:36-44)

<sup>32</sup>“Ma eġa aiai ita aramanei nai marana bo madeġa aiwai ina nei. Anela au mara eġa ita aramanei ma Natuna eġa ita aramanei. Amana, tauna ava i aramanei. <sup>33</sup>Onavi neneġana ma matami ina kala!† Eġa ota aramanei mara aiwai, wei kauai ina tupua. <sup>34</sup>Wei me rava ana numa i netawanei ma i vaġai. Ma ana taunola nununai i terei da itavi pai pai ma tagotagogi ava ai nola i verei da ita kauai. Ma metaeta tau-painina i riwei da itavi neneġana. <sup>35</sup>Onavi neneġana! Eġa ota aramanei mara aiwai, numa taniwagana e nenei; mepa da au bigai bo au nubautuva bo maratmtomai bo ubaubanai. <sup>36</sup>Mepa da ina nelaġilaġinai, eġa matamatavemi ina nelaġaimi. <sup>37</sup>Aiwai riwana a ririwemi, riwana tagogina rava anapupui a riwei, onavi neneġana!”

### Jew ai babada, Iesu i oġei da itavi raġeni

(Mat 26:1-5; Luk 22:1-2; Jhn 11:45-53)

**14** Au pom ruaġa muriai da **Raġona** ma **Palawa Bagibagina** torelai,† **Pirisi Babadai** ma **Tarawatu Babadai** eta i baibaiei da menanare govagovaġane i Iesu ita vunui. <sup>2</sup>Ma i riwa, “Au torela wei kauai eġa tana kauai, mepa da viġaiġaiawa ġaeġaena ina tupua.”

### Wavine, daji ġabuġabuna Iesu au kolana i waġi

(Mat 26:6-13; Jhn 12:1-8)

<sup>3</sup>Maranai Iesu au *Bet-Ani*, Simon i ġoreġorei **lepeleperana** ana au numa i kiala ma i amam. Wavine, waġi wavana alabaster i voai ma i ġeta ma waġi uana ivo ġai ma daji ġabuġabuna, maiana ġaeġaena e ġoreġorei *nard*, Iesu au kolana i waġi. <sup>4</sup>Rava ġelau i kampa i mamae i ġaiawa ma i riwa, “Aiwai au baina daji uvi kalokaloei? <sup>5</sup>Wei dajina ita gimarei 300 *denarii* §ruvana ma manena molamolakai ita verei.” Ma tau, wavine ivi enenei.

<sup>6</sup>Wate Iesu i riwa, “Onavo terei! Aiwai au baina ovi nuabolai? Tauna, kaua aiaina awariu i kauai. <sup>7</sup>Molamolakai awarimi e mamae nonoa ma ona ġoei ma tau ona voagui. Wate tau awarimi eġa ata mamae nonoa. <sup>8</sup>Wavine ana nola i kauai. Tauna, dajiei tupuau ivo kaukauana nonoei vikokoaga au baina.\*\* <sup>9</sup>A ririwana

†**13:33** Wedau Evanelia i girumi, ‘ma i raupari,’ wate buka wadubo nonoana wei eġa ita mamae, Luk 21:16 kampa ona inana da e mamae.

†**14:1** Raġona/passover Exo 12:1; Palawa Bagibagina/Unleavened Bread Exo 12:17; 23:15

§**14:5** Wei lamna me taubagibagi ana maia madeġa tagogi au baina.

\*\***14:8** Mai Jew ai kaua da taubeu dajiei e bulobuloi muriai au kokoaga e tereterei.



kauemi, mepa Riwa Aiaina i rau-gugulei dobu au ana tapui, wei wavinena aiwai i kaukauei ina babaniei, ma eġa nuanuai ina vuru.”

<sup>10</sup> Judas *Iskariotei* tauna 12 tagogi, Pirisi Babadai awari i ġeta da Iesu itavi benabenamei. <sup>11</sup> Tau i vi nuaiai kava maranai wei i nonori ma Judas i parivai-nuaġani da mane ita verei. Ma Judas i inana da mepa gavogavo ita inana da Iesu ita amverenei.

### Iesu ma tau i 12 Raġona torelana i ani.

(*Mat 26:17-25; Luk 22:7-14, 21-23; Jhn 13:21-30*)

<sup>12</sup> Ma **Palawa Bagibagina** torela inavi karei. Maranai **sipu** orotoi ġaubo i e vunuvunui **Raġona** torelana au baina. Tavvotaġotaġo, Iesu i paridadanei, “Mepa u ġoġoġoi Raġona torelana anavo kaukauei au baim?”

<sup>13</sup> Iesu, tau i ruaġa i riwei ma i paritawanei, “Ona nae au *Jerusalem* ma oroto, waira wagina e avavaraġi ona inana ma onavo taġotaġoi. <sup>14</sup> Au numana e ruiruiana, numa taniwagana ona riwei, ‘Ai tauviararamana i riwa. Numa vokaukauana mepa ma au Tavvotaġotaġo maiteni Raġona torelana ana ani?’ <sup>15</sup> Ma tauna, numa vatavata i inavi atataiemi ivo kaukauana nonoei ma kampa au baita ona vokaukaua.”

<sup>16</sup> Tavvotaġotaġo i nae au *Jerusalem* ma i ririweia nanare i nelaġai ma Raġona torelana ivo kaukauei.

<sup>17</sup> Au i biga ma Iesu i nei tau i 12 maiteni. <sup>18</sup> Tau i au kepa kepa i amam ma Iesu i riwa, “Anina a ririwemi. Taumi tagogi inavi benabenameu; tagogi weka maiteni amam.”<sup>h</sup>

<sup>19</sup> Tavvotaġotaġo i vi nuabola ma tagotagoga i pa, “Eġa tau tapa?”

<sup>20</sup> Iesu i paribelei, “Taumi tagogi weka palawa evivi galoi au aboma tau maiteni. <sup>21</sup> Wariaġa i girugirumia nanare, **Rava Natuna** ina iraġe. Wate aia da Rava Natuna i vi benabenamei; tauna, kovoġa ġaġaena ina vaia! I ai da alona avena itavi natunei.”

<sup>22</sup> Maranai i amam ma Iesu palawa i vaia ma i vi egualau, ivo gimagimai ma Tavvotaġotaġo i verei ma i riwa, “Ona vaia; wei tupuau.”

<sup>23</sup> Anina ma *wine* kelakana i vaia ma i vi egualau ma i verei da anatapai i me i. <sup>24</sup> “Wei tau tarau i toi rava maġamaġau i au bai ma au **parivai-nuaġana bagibagina** ina vovai-virewapani.<sup>i</sup> <sup>25</sup> Anina a ririwemi, *wine* eġa melana i ana uma me i da maranai *wine* vouna ana umai God ana au vigulau.”

<sup>26</sup> Ma tau i voepaepa welana i ravi ma i ġae au Ola *Olives*.

### Peter, Iesu ina boviei

(*Mat 26:31-35; Luk 22:31-34; Jhn 13:36-38*)

<sup>27</sup> Iesu, tau i riwei “I girumi nanare, God i riwa, ‘*Tauviġamoġamo anavi raġeni ma sipu inavi lamonei.*’ (*Zec 13:7*) Ma nanare anatapumi ona ruba tawaneu. <sup>28</sup> Wate au vomairi au murina ana aivinao au **Galili.**”<sup>j</sup>

<sup>29</sup> Peter i riwa, “Mepa da anatapai ina ruba tawanem, wate eġa tau!”

<sup>h</sup>14:18 Psa 41:9    <sup>i</sup>14:24 Gen 17:2; Gen 17:7-9; Exo 24:8; Jer 31:31-34

<sup>j</sup>14:28 Mat 28:16

<sup>30</sup> Iesu, Peter i riwei, “A ririwana kauem da amadodo waguvarai muriai da kokoreko ina tou mara ruağa; tam mara tonuğa ma boviu.”

<sup>31</sup> Wate Peter, ponana i bagibagi ma i riwa, “Avena mepa da tau, tam maiteni ana iraġe. Eġa melanai ana boviem!” Ma tau i ġelau i riwana tagogina i latoni.

### Iesu au Getsemani i raraupari

(Mat 26:36-46; Luk 22:39-46)

<sup>32</sup> Ma au *Getsemani* i ġeta ma Iesu, ana tauvotaġotaġo i riwei, “Weka ona kiala ma ana raupari.” <sup>33</sup> Ma Peter, James ma John i taravaini ma nuanuana i iraġe ma nuanuana i bola-kauei. <sup>34</sup> Ma tau i riwei, “Au nuabola i rata kaua au orau da e vunuvunuii. Weka ona mae ma onavi neneġana.”

<sup>35</sup> Ma aburuna i veraunae ma au doa i peu ma i raupari da mepa da tagotagogina, lamna wei marana apoapoen tauna ita netawanei. <sup>36</sup> I riwa i pa, “*Abba* Amau! Aiwai anapuna tagotagogina tam awarim. Wei kovoġa kelakana ma vaitawanei. Wate eġa tau au ġoana, wate tam am ġoana.”

<sup>37</sup> Ma Iesu i nememei ma tau i tonuğa rarau-nuavurui i nelaġai. Ma Peter i riwei, “Simon!<sup>††</sup> tam aiwai matavena? Mara aburuna utavi neneġana bo eġa?” <sup>38</sup> Ma Iesu, tau i riwei, “Onavi neneġana ma ona raupari da eġa au raelara ona peu! Arua e ġoeġoei, wate tupua i ġokokokara.”

<sup>39</sup> Ma i nae me ma parina tagogina i raupariei. <sup>40</sup> Maranai i nememei ma i nelaġai, i matamatave; tau, matai i vitai. Ma tau i eġa ita aramanei aiwai ita riwei.

<sup>41</sup> Mara vitonuina i nenememei ma tau i riwei, “Taumi amapo ona matamatave ma laumi ina tautau? Anina! Mara i ġetai, ona inanai. **Rava Natuna** inavi benabenamei ġoa-apoapoe ravai au urai. <sup>42</sup> Onavo mairi; tana nae; ona inana! Tau-vibenabenameu e nenei!”

### Iesu i pani

(Mat 26:47-56; Luk 22:47-53; Jhn 18:3-12)

<sup>43</sup> Iesu i bababani ma Judas, tauna Tauvotaġotaġo tagogi i ġetai. Tauna, patara maiteni i nei ana api ai. Piri si Babadai ma Tarawatu Babadai ma dogadogara, wei ravai i paritawaneiai. <sup>44</sup> Muriai da Iesu awarina ita ġeta; Judas, patara ai mataira i verei, “Orotona anavi ġialaġolaġonei; nai tauna. Ona pani ma ona naiei ma ona inana kauei!”

<sup>45</sup> Maranai Judas i ġeta ma i nae Iesu awarina ma i riwei, “Tauviararamana!” Ma ivi ġialaġolaġonei. <sup>46</sup> Ma tau i, Iesu ivo jijini ma i pani. <sup>47</sup> Ma tagogi kampa i maimairi, ana sword i taina lavui ma Piri si ġeġetelarana ana taunola taniġana i borituini. <sup>48</sup> Ma Iesu, tau i riwei, “Taumi ana api ai o nei da ota panii bo, apamina tau am-kwalakwalau? <sup>49</sup> Mara patapatai taumi maiteni ta mamae au Tempol ma avi araramana ma eġa ota panii. Ma riwa i girugirumia nanare, ina tupua.”<sup>k</sup>

<sup>50</sup> Ma Tauvotaġotaġo anapui, Iesu ivo terei ma i rubatawanei.

<sup>51</sup> Ma laraga tagogi, gara maiana ġaeġaena ivi karekoei ma Iesu ivo taġotaġoi. Tau i ġoei da itavo jijini, <sup>52</sup> wate tau i ana kareko ivo jijini ma ana kovakovana i ruba.

---

<sup>††</sup>14:37 Au Mk 3:16 Simon wavana i virai da Peter.

<sup>k</sup>14:49 Luk 19:47; 21:37

### Tau, Iesu i etarei.

(Mat 26:57-68; Luk 22:54-55, 63-71; Jhn 18:13-14, 19-24)

<sup>53</sup> Ma tau, Iesu i naiei Pirisi Ġeġetelarana, Pirisi Babadai, dogadogara ma Tarawatu Babadai mepa ivi tagogieiana. <sup>54</sup> Ma Peter ivo taġotaġo da Pirisi ġeġetelarana ana numa. Ma ana au debadeba, tauvi pai pai maiteni i kiala ma au ai ivivi airara. <sup>55</sup> Pirisi Babadai ma mai *Jew* ai boru ġeġetelarana,<sup>‡‡</sup> Iesu ana apoapoe i baiei da itavi raġeni; ma i baiana avei. <sup>56</sup> Matamata maġamaġau, Iesu ivi wavu morumoriei, wate ai viwavu taputapunei ava.

<sup>57</sup> Ma ġelau ivo mairi ma wei wavuna morumoruna i kauei Iesu awarina. <sup>58</sup> “Tauai a nonori tauna i riwa, ‘Wei Tempolna rava i voavoia. Tau ana rikai ma au pom tonuġa au murina, Tempol ġelauna ana voai ma lamna eġa rava ita voai.’” <sup>59</sup> Wate nanare ai viwavu taputapunei ava.

<sup>60</sup> Pirisi ġeġetelarana i mairi tau i naoi ma Iesu ivi taravirevirei, “Wei ravai evivi wavuim ma eġa aiwai ma paribelei bo?”

<sup>61</sup> Ma Iesu i genuana ma eġa ita paribelei.<sup>¶¶</sup> Ma Pirisi ġeġetelarana ivi taraviravirana melei, “Tam *Keriso* bo? Viviaiainana Natuna bo?”

<sup>62</sup> Iesu i paribelana, “Tau tauna! Ma ‘*Rava Natuna ona inanai, Vivirewapanana au oiena ina kiala*’ ma ‘*mara ladanei ina nei*.’”<sup>m</sup>

<sup>63</sup> Pirisi ġeġetelarana, amlona i ġaiġai ma ana gara i sikai ma i riwa, “Aiwai au baina matamata ġelau tana ġoei? <sup>64</sup> Taumi, vijiboġa<sup>n</sup> o nonori ma ami nota aiwai?”

Tau anatapui i riwa, “Tauna ana ġoa-apoapoe au baina anina da ina iraġe!”

<sup>65</sup> Ma ġelau i rau-karei ma Iesu i ovai ma naona i purui; i rau-navanavai ma i riwei, “Ma pariverelai, aiai i ravim!” Ma tauvi pai pai, Iesu i vaia ma i vunui.

### Peter Iesu i boviei

(Mat 26:69-75; Luk 22:56-62; Jhn 18:15-18, 25-27)

<sup>66</sup> Ma Peter au gabaura i mamae ma Pirisi ġeġetelarana ana taunola guguini i ġetai. <sup>67</sup> Maranai tauna, Peter i inanai ivivi airara; ma i inanatunutunui ma i riwa, “Tam maiteni Iesu *Nasaretei*, ana tauvotaġotaġo.”

<sup>68</sup> Wate tauna i bovi ma i riwa, “Eġa ata aramanei aiwai e bababaniei, avi nuainai!” Ma i tuopu au metaeta ma [kokorereko i tou<sup>§§</sup>].

<sup>69</sup> Taunola guguini, Peter i inanai ma i rau-karena melei ma rava au ġereġere i maimairi i riwei, “Wei ravana, tau tagogi!” <sup>70</sup> Wate Peter i bovi me.

Mara aburuna muriai, tau i ġereġere i maimairi, Peter i riwana melei, “Tam anina, tau tagogi; au baina tam, *Galliei!*” <sup>71</sup> Ma Peter i riwa, “God au matana, tau a ririwa kaua, ravana o ririweia avivi nuainai!”

<sup>72</sup> Maratagogi kokorereko i tou mara viruaina ma Peter, Iesu riwana i notai, “Muriai da kokorereko ina tou mara ruaġa, tam mara tonuġa ma bovieu.” Ma Peter ivi nuabola kaua ma i tou.

<sup>‡‡</sup>14:55 mai Jew e ġoreġorei Sanhedrin.

<sup>¶¶</sup>14:61 Isaiah i parivereta da *Keriso*ana au iraġe eġa ina gagaloana melei. (Isa 53.7).

<sup>§§</sup>14:68 Wei riwana buka au wadubo nonoana eġa ita mamae.

<sup>l</sup>14:58 Jhn 2:19

<sup>m</sup>14:62 Dan 7:13

<sup>n</sup>14:64 Lev 24:16



<sup>22</sup> Tauī, Iesu i naiei da gabu i ġoreġorei *Golgotha*, lamna anona unu gabuna. <sup>23</sup> *Sorodia*, *wine* bunama *myrrh* maiteni i virai ma Iesu i veredadani, wate tauna i geduaiei.

<sup>24</sup> Ma Iesu i tuparatui ma ana gara, tauī ava au orai i ġutai<sup>§</sup>

<sup>25</sup> Ubaubanaī 9 kilok nanare, Iesu i tuparatui. <sup>26</sup> Aniviwawuna i girumi ma i tutui, “Mai *Jew* ai wavalatona.” <sup>27–28</sup> Danedanenei ruaġa, Iesu maiteni i tuparatui; tagogi au oiena ma ġelauna au kelakelauna.\*\*

<sup>29</sup> Taubabara, kolai i kwajikwajiei ma Iesu ivivi namei, “Na! tam, Tempol tau-rikaina ma au pom tonuġa ma ma voa meleī. <sup>30</sup> Mavi lawana melem ma *korosiei* ma ġairai!”

<sup>31</sup> Ma nanare Pirisi Babadaī ma Tarawatu Babadaī maiteni, Iesu ivivi namei, “Rava ġelauī ivi lawani, wate ainelana itavi lawana melana avei. <sup>32</sup> *Keriso*, Israel ana Wavalatona; marina *korosiei* ma ġairai ma tana inanai da tanavi tumaġaneī!” Danedanenei i tupatuparatui maiteni, Iesu ivi namei.

### Iesu ana irāġe

(*Mat 27:45-56; Luk 23:44-49; Jhn 19:28-30*)

<sup>33</sup> Ma au benai dobu anatapuna i waguwarei da 3 kilok au bigai. <sup>34</sup> Lamna maranaina Iesu ponana i rata ma i kwatu, “*Eloi, Eloi, lama sabachthani?*” Lamna anona: “*Au God, au God aiwai au baina u netawaneu?*”<sup>††</sup> <sup>35</sup> Ma rava ġelauī au ġereġere i maimairi i nonori ma i riwa, “Ona rau-taniġaneī, Elijah e kwatukwatueī!” <sup>36</sup> Ma rava tagogi i ruba da gara ai au damona i pani ma au *wine* tomatomana ivi galoi ma ivo epai Iesu au ipirina ma i riwa:<sup>‡‡</sup> “Onavi pai pai ma tana inanai mepa da Elijah ina nei da ina tereġaireī.” <sup>37</sup> Ma Iesu ponana i rata ma i kwatu ma i lavutu tawanana. <sup>38</sup> Ma Tempol au orana anitereġaġara au pouna i wanasikai au tepana da i ġaira au doa. <sup>39</sup> Ma *sorodia* ai bada, Iesu au naona i maimairi; i inanai da i lavutu tawanana ma i riwa, “Wei anina God Natuna.” <sup>40</sup> Waivine ġelauī aueia i mae ma i raraubiga: *Mary Magdaline* ma *Mary* (James keikeina ma *Joses*<sup>¶¶</sup> aloi) ma *Salome*. <sup>41</sup> Tauī, Iesu ivo taġotaġoi ma ivovo agui maranai au *Galili* i mamae ma waivine ġelauī maġamaġauī, tauna maiteni i ġeġae au *Jerusalem*, anatapui kampa.

### Iesu ivi kokoagei

(*Mat 27:57-61; Luk 23:50-56; Jhn 19:38-42*)

<sup>42–43</sup> Ma au biga i tuturiai *Joseph Arimatieī*,<sup>§§</sup> tauna rava ġaeġaena tagogi boru ġetelarana au orana. Tauna God ana vigulau ana nei ivi pai paiei. Ma vokaukaua

§15:24 Tauī ġaima i tawaneī me ‘dice’ da aiai aiwai garana ita vaia.

\*\*15:27-28 Giruma ġelauī waduboi verse 28: e mamae ‘Ma aiwai i kaukaueia lamna peroveta i ririweia i tupua, “Tauī i inanai me tauī ġoa-apoapoe taukauei.”’ (Isa 53:12)

††15:34 Ps 22:1

‡‡15:36 Psalm 69:21 peroveta i girumi da *Keriso ita verei*.

¶¶15:40 Au Matthew 27:56, Matthew i girumi *Joseph* ma eġa *Joses*.

§§15:42-43 Eng. Arimathea.

marana (Lamna *Sabate* au naona)\* ma Joseph ana tepatorana, *Pilate* awarina i rui ma Iesu tupuana ivi baḡei. <sup>44</sup> *Pilate* i baei da Iesu boiboḡi i iraḡe. Tauna, *sorodia* ai bada i kwatuei ma ivi taravirevirei da Iesu i iraḡe bo eḡa? <sup>45</sup> Maranai *sorodia* ai bada i pariverei da anina riwa kaua. Ma *Pilate*, Joseph i riwei da Iesu tupuana i vaia.

<sup>46</sup> Joseph, gara maiana ḡaeḡaena i gimarai ma Iesu tupuana i tereḡairei. Gare i umai ma au guba tupuana ivi mataveni ma ḡaima ḡaeḡaena i kaipeuri da kokoaga metaetana ivi aitomeni. <sup>47</sup> *Mary Magdaline* ma Mary - Joses alona i inanai mepa Iesu tupuana ivi mataveni.

### Iesu ivo mairi

**16** Ma *Sabate* au murina, *Mary Magdaline* ma Mary - James keikeina alona ma Salome, bunama ḡabuḡabui i gimarai da ita naiei Iesu tupuana ita buloi.<sup>†</sup>  
<sup>2</sup> Ma Sunday ubaubanai boiboḡi maranai madeḡa i gogogo, tau i nae au kokoaga.  
<sup>3</sup> Ma i nenaē ma i bababani, “Aiāi au baita ḡaima kokoaga au metaetana ina kaipeura tawanei?”  
<sup>4</sup> Maranai tau i taepai, i inanai da boiboḡi ḡaima i kaipeura tawanei - ḡaima ḡaeḡae kaukauana.  
<sup>5</sup> Maranai i rui au orana ma oroto laragana i inanai au oiena.<sup>‡</sup> Ma tau i orai i auepai.  
<sup>6</sup> Tauna i riwa, “Eḡa orami ina auepai, taumi, Iesu *Nasaretei* o baibaiei bo? I tupatuparatuia; tauna ivo mairi! Ona inana, tauna eḡa weka! Tau i weka tupuana ivi mataveni.  
<sup>7</sup> Marina ona nae ma ana tauvotaḡotaḡo ona riwei, ma Peter eḡa nuanuami ina vuru da Iesu evi vinoa au *Galili*. Kampa ona inanai i ririwemi nanare.”  
<sup>8</sup> Tau i opu ma kokoagei ivi ruberubei ana ini sisisi ma ana rovoi. Tau i rovo kaua, lamna au baina eḡa rava ita riwei.

### Mark 16:9-20 <sup>¶</sup>

#### Iesu Mary Magdalene awarina i eḡa

<sup>9</sup> Iesu iraḡelei ivo mairi me au Sunday ubaubanai boiboḡi ma i ainae da *Mary Magdaline* awarina i eḡa. Maraotai Iesu, Mary awarina arua-apoapoei seven ivi opuni.  
<sup>10</sup> Iesu, ana tauvotaḡotaḡo ivivi nuabola ma i toutou ma Mary i ḡeta da i pariverei.  
<sup>11</sup> Ma Mary i pariverei da Iesu i lawana me ma tauna matanei Iesu i inanai. Wate tau i eḡa itavi tumaḡanei.

#### Iesu, tauvotaḡotaḡo ruaḡa awari i eḡa

<sup>12</sup> Wei au murina Iesu inanana tapuna ma ana tauvotaḡotaḡo ruaḡa awari i eḡa; maranai tau i nenaē au melagai.  
<sup>13</sup> Tau i nae me ma tauvotaḡotaḡo ḡelau i eḡei. Wate tau i nanare eḡa itavi tumaḡanei.

\* **15:42-43** Mai *Jew* ai *Sabate*, madeḡa e neneulai au Friday evivi karei da madeḡa e neneulai au Saturday e kwakwa. Mai *Jew* ai Tarawatu e ririwa da rava i iraḡe lamna marana tagogina ina doboi. *Sabate* amadodo madeḡa e neneulai inavi karei lamna au baina Joseph ivo laḡilaḡina da Iesu taubeuna ita doboi.

<sup>†</sup>**16:1** Mai *Jew* ai kaua maemaena da taubeu monamonei ina buloi ma muriai ina doboi ma waivine i ḡoei da wei kauai itavo taḡotaḡoi.

<sup>‡</sup>**16:5** Tupua ivi mataveni au oiena i kiakiala, ana gara ararapoirina.

<sup>¶</sup>**16:8** Mark ana Riwana Aiaina damona lamna wariḡa ivi neboai. Ma rava ḡelauna aiwai i notanotai nanare au verse 9 da 20 i girumi. Wei damonana weka ivi karei.

### Iesu Tauī 11 awari i eġa

<sup>14</sup> Muriai tauī 11 i amam ma Iesu awarii i eġa. Ma i eni au baina tauī orai i bado ma eġa itavi tumāġana maranai rava, tauī i riwei da Tauna ivo mairi me. <sup>15</sup> Iesu, tauī i riwei, “Ona nae dobu au anapuna. Ma God **Riwana Aiaina** ona jimei rava anapui awarii. <sup>16</sup> Aiai da ivi tumāġana ma i babataito; tauna ina lawana. Ma aiai da eġa **itavi tumāġana** ina kovoġi. <sup>17</sup> Ma tauī aiavoi da ivi tumāġana, rewapana ina verei da **kaua babai** ina kauei. Ma arua-apoapoei inavi opuni ma pona tapunei ina babani. <sup>18</sup> Tauī, mota uraiei ina vaia ma waiawa ina umai ma eġa ina rau-putei. Ma urai doridoriai au kolai ina terei ma ina lawana.”

### God, Iesu i ġaiei au Mara

<sup>19</sup> Bada Iesu, awari i babani vorovei. Ma tauna i ġaiei au mara ma God au oiena i kiala. <sup>20</sup> **Tauvotaġotaġo** i opu ma dobu au anapuna i rarau-gugula. Ma Bada, tauī ivo aġui ma kaua babai i kaukauei da Tauvotaġotaġo aiwai i bababaniei ivo vairewapani.